

# Poli'a Romu Vahe Avonkre Zami'nea Naneke

---

## Poli'a musenke Romu vahe atrezmante'nea naneke

**1** <sup>1</sup>Nagra Poli'na, Kraisi Jisasi kazokzo eri'za ne'mo'na, Anumzamo aposol eri'za erio huno huhampri'nanteno, knare musenke'a huama hanugu nazeri ruotge hunantene. <sup>2</sup>Korapa Anumzamo huvempa kea kasnampa vahe'amokizmi zmasamige'za, Ruotge Avontafepi krente'naze. <sup>3</sup>E'i ana Mofavre'a Deviti naga nofipinti, ne'mo ama mopafi avufga erino efore hu'ne. <sup>4</sup>Hagi Ruotge Avamumo'a hihamu'ane huama huno, Anumzamofu Mofavre azeri oti'negeta, Jisas Kraisi'a Rantimo'e nehune. <sup>5</sup>Jisas Kraisi azampi Anumzamo'a asunku huranteno, Agri agifi Anumzamo'a aposol eri'zama miko megia' vahetema erisunku huhampri'antene. E'ina hu'negu zmagra Agri Agifina amagera nente'za zamentintia hugahaze. <sup>6</sup>Tamaganena Jisas Kraisi nagare hu'zama mani'naza nagapi mani'naze.

<sup>7</sup>Anumzamo'ma tmavesinteno kema higeta mika Romu kumate mni ruotge hutma mni'naza nagamotarega, Anumza Nafatimofone Rantimofu Jisasi Kraisi asunku'zamo'ene, rimpa fruzamo'a tamagra ne megahie.

## Poli'a Romu vunaku antahintahi hu'nea naneke

<sup>8</sup>Kota'zana, Jisas Kraisi agifi, Anumza ni'amofona maka'motamagura susu huntue. Na'ankure tamagra tamentintima haza zamofu kea, mika kotega huama nehaze. <sup>9</sup>Na'ankure Anumzamofoma nagra maka nagu'aretima eri'zama'a erinentena, Nemofo knare musenkema huama nehumo, tamagriku'ma nentahi'na nunamuma nehuazana, nageno antahino nehie. <sup>10</sup>Mika zupa nunamuma hufina, Anumzamofu avesima menesigena, tamagritega esugura nunamuna huvava nehue. <sup>11</sup>Na'ankure tamagri'ma eme neramagena, Avamumofu musezama nagripi me'neazama nerami'nugeno, tamazeri hanavetisia zankura tusi'za huno navenesie. <sup>12</sup>E'i ana zana, tamagri tamentinti azeri hankaveti ke neramasami'nea, nagri'enea ana zanke huta nazeri hanaveti kea

nenasamisageta tamentintifina oti hanavetita manigahune. <sup>13</sup>Nafuhetane nasaraheta antahisazegu nehue. Nagra nantu eme antenermantena eri'za tamagripi enerisugeno, megia nagapi hu'neaza huno Avamumofu rga'a tamagripi efore hanigena kesua zankura, rama'a zupa antahintahini'a retro hu'noanagi mago'a zamo nazerigena, omena mani'nogeno menina ama knarera ehanatie. <sup>14</sup>Eri'za eri'na, Griki vahe'ene, ko knafi vahekna vahe'ene antahintahiza me'nea vahe'ene, antahintahiza omne vahe'mokizmine, zmaza hanugu Nagrira hunantene. <sup>15</sup>E'ina hu'negu Romu kumate mni'naza nagamotarega, Anumzamofu knare musenkema eme huama hu'na tamasamizankura tusi'za huno navenesie.

### **Knare musenkemofu hankve'amofu naneke**

<sup>16</sup>Na'ankure Kraisi knare musenkegura nagazea nosue. Na'ankure e'i Anumzamofu hanave'a anampina me'neankino, iza'zo zamentintima hanamokizmia zmahonekeno, Jiu vahe esera zamavreteno, anante megia vahera zamavregahie. <sup>17</sup>Na'ankure ama ana knare musenkefi, Anumzamo fatgo avu'avaza hurante'nea avu'avamo'a efore hu'ne. Eri agafa huneretima vuno vagaretema uhanatisiana, amentintima hu'zamo azeri ruotagera hugahie. Avontafepi huno, ***Fatgo vahe'mo'za zamentinti zanteti zamasimura eri'za manigahaze*** hu'ne. (Hab 2:4)

### **Maka kumiku Anumzamo rimpa ahente'nea naneke**

<sup>18</sup>Na'ankure Anumzamo'a, Agra'a monafinkatira rimpahazana eri'ama huno, Anumzamofu fatgo avu'ava nosu'za, fatgo osu zmavuzmava nehaza vahe'mozama ana zamuzmateti'ma, tamage kemofu rentrako nehaza vahera ha'rezamantegahie. <sup>19</sup>Na'ankure Anumzamofoku'ma ke'za antahizama huzantmina amuno zmifina ama hu'ne. Na'ankure ko Anumzamo avu'avazama'a eriamana huno zmaveri hu'ne. <sup>20</sup>Hakare'zama troma higeno fore'ma hu'neregatima e'neana, Anumzamofu mevava avu'avazana ke'naze. Hianagi hakare'zama erifore huneregatima e'neana hakarezamo'a Anumzamo'ma tro hunte'nea avamente nege'za vahe'mo'za negaze. E'i ana agafare Anumzamofu oku me'nea hankave efore hige'za negazankiza, vahe'mo'za onke'none hu'za osugahaze. <sup>21</sup>Hu'negu Anumzamofona ke'za antahiza hu'nezagi, zamagra Anumzane hu'za ra agi'a nomiza, humuse hunontaze. Hagi zamagri'a neginagi antahintahizamo zmazeri savri hige'na, zmagu'amo'a hanizampi neme. <sup>22</sup>Zamagra antahizane vahe mani'none hu'za nehazanagi, zamagra neginagi vahe fore nehaze. <sup>23</sup>Hagi zamagra manivava Anumzamofu ra agima amigazana, erimare'za fri'naza vahe'mofu amema'agi, nmaramimofu amema'agi, 4'a agazane zagagfamofu amema'agi, zmurugufati vano nehaza zgaramimofu amema'a tro hunte'naza zante ra agi nemize.

<sup>24</sup>E'ina hu'nagu Anumzamo'a zmatrege'za, zamagra zamaguareti zamavesintaza kefo avu'avazampi unefre'za, kefoza huno havizantfa hu'nea avu'avaza zamagra zamufgare ohunte ahunte nehu'za, zamufga eri haviza hu'naze. <sup>25</sup>Anumzamofa tamage kea, havigereti eri revahe nehu'za, Anumzamo, Agra'a troma hunte'nea zgaraminte monora hunte'za amage nente'za, troma hu'nea Anumzamofa ra agia amivava hugazanagi anara nosaze. Tamage. <sup>26</sup>Ama anahu agafare Anumzamo'a zmatrege'za, vahe'mofoma agaze ami avu'avazamofa zmavesizampi nehaze. Ane'mo'za osuga zmavu'zmava hu'za zamagra zamagra havi zamavu'zmavara nehaze. <sup>27</sup>Anahukna hu'za, venene'mo'za a'nene veazana hugazanagi, netre'za, venenemo'za zamagra zamagra monkozama hu'zanku tusiza huno zamavenesige'za, zamagaze hu avu'avaza zamagra zamagra nehaze. Ana kumima hazazamofa, mizama'a zamagra'a zamata enerize.

<sup>28</sup>Zamagrama Anumzamofa zmefi hunte'za agorga'ama omninazana neginagi zane hu'za nehaza zanku, Anumzamo'a atregeno havi antahintahizazmimo rentrako hige'za, osuga avu'avazana nehaze. <sup>29</sup>Zamagripina hakare havi kefo avu'ava zamo'a avitege'za, kefo zmuzma nehu'za, veva osu agraguke antahizane, vahe'mofa avesi onte'zama, antahi mugizama, vahe ahefri'zama, ke ha' huza kanive oreare huzama, krunage hu'zama, vahe'mofa fruge huonte'zama, vahe'mofa amefi ke hu'zane, <sup>30</sup>vahe'mofa avufintanke huno hu kofinte'zama, Anumzamofa antahiomizama, veganokno huzama, agra'ama erintesga hu zmavuzmava nehu'za, kasefa kefo avu'avaza eri fore nehu'za, zmarera zmafa agorga nomnize. <sup>31</sup>E'inahu vahepina knare antahintahizana omanegeni, rumofoma antahimizana omanegeni, vahe'mofoma avesinteno, asunku huntezana omanene. <sup>32</sup>Zamagra ko Anumzamofa kasegemo'ma fatgo osu zmavu'zmavama hanaza vahe'mo'za frigahaze hu'nea kea antahinazanagi, ana kesegea amage nonte'za, ana kefo avu'avazana nehu'za, mago'ane rumokizmia hiho hu'za antahintahia zamizage'za nehaze.

### **Anumzamo fatgo huno refako haniazamofa naneke**

**2** <sup>1</sup>E'ina hu'negu tamagra antahisazana rumo'za haviza hu'naze hutma refko huzmante gahazanagi, tamagranena anahukna hutma havi vahe mani'nazankitma mago'a kea osugahaze. Tamagrama rumokizmigu havi vahe maninazankiza zamata erigahaze hutama huzmantesazana, tamagranena anahukna hu'nazankino, tamagri'enenana anazanke hurmantegahie. Na'ankure rumofoma refko nehamoka, kagranena ana hukna hu'nane. <sup>2</sup>Hagi antahi'none, Anumzamo'a fatgo avu'avazanteti, iza'o anazama hania vahera refko huno knazana amigahie. <sup>3</sup>Kagra rumozama anazama hazana refko hunezmantananki, nahigenka kagra zamagrikna hunananki, Anumzamo'ma refko huzmantesnifintira agateregahue hunka nehane? <sup>4</sup>Kagra nonkano knaza

amunanagi knarezantfa huno agazone huneranteno, akoheranteno mani Anumzamo'ma kagri'enema mani'neana? E'i anazamo'a kagritera amneza me'nefi? Kagra nonkano knare'ma hunegantenoma kumipintima kagu'a rukrahema hnazegu'ma knama kaminoma ne-eazana nontahino? <sup>5</sup>Hianagi krimpa'mo hankavetigenka kumimofoma kamagena humizankura kavenosie. E'i kagra'a, kefoza huno havizantfa hu'nea mizama erisana mizanka'a eri atru nehane. Na'ankure Anumzamo'a rimpahе kna ne-enkino fatgo refakozama'a erinte'ama hugahie. <sup>6</sup>Anumzamo'a znavu'zamavama nehanaza avamente, magoke magokemofona mizana amitere hugahie. <sup>7</sup>Iza'zo knare zamuzma huvava hu'za nevu'za, ra zmagima erisagu nehake'za, himamu hankave erisigu nehake'za, haviza osniazanku nehakesamokizmia, Anumzamo manivava zmasimura zamigahie. <sup>8</sup>Hu'neanagi Agra rimpa he'zana rukaha hutresigeno, iza'zoma zamagraguke nentahiza, tamage ke'mofo amage'ante zanku zamagena hunemiza, kefo avu'ava nehanaza vahete egahie. <sup>9</sup>Kefoza huno havizantfa hu'nea knazamo, kefozama huvava hu'za nevanaza vahetera egahie. Esera Jiu vahete eteno, anahukna huno megia' vahete enena egahie. <sup>10</sup>Hu'neanagi masanentake avasesezama, ragi eri'zama, rimpa fruzana makama knare'zama nehza vahe Anumzamo'a zamigahie. Esera Jiu vahe zamiteno, anantera anahukna huno megia' vahera zamigahie. <sup>11</sup>Na'ankure Anumzamo'a magoke mofonkuke osuno, fatgo avesizanteti ana miko vahera refko nehie.

<sup>12</sup>Na'ankure megia' vahe'mo'za Anumzamofu kasege krenteneana ontahine'za kumira hugahazanagi, zamahe fanene hugahie. Jiu vahe'mo'za Anumzamofu kasege eri'naza vahe'mozama kumi'ma hanazana, ana kasegereti refkoa huzmanteno knazana zamigahie. <sup>13</sup>Hu'negu kasegema antahike'zama nehamo'za, Anumzamofu avurera fatgo osu'naze. Hianagi kasegema amage nentaza vahe'mo'za Anumzamofu avufina fatgoa hu'naze. <sup>14</sup>Na'ankure megia' vahe'mo'za Anumzamofu kasegema krente'neana e'orinazanagi, zamagra zamagu'afina ko havizanki knarezanki hu'za nentahiza amage nentaze. <sup>15</sup>E'inahuma hazazamo zamagrira Anumzamofu kasegema zamagu'afi krenteneana erinteamana nehaze. Ana hu'negu zamagra zamagu'afi nentahizageno, antahintahiza'zmimo zmasamino, knare'za nehazanki haviza nehaze huno nezmasamie. <sup>16</sup>Hagi mago kna ne-enkino Anumzamo'a Jisas Kraisimpi ana miko vahe'mofo oku'a antahintahizmia refko hugahie. Ama knare musenkemo hu'nea kante neramasamue.

### **Kasegemo Jiu vahe'mokizmi kegaga huzmantesia naneke**

<sup>17</sup>Tamagra Jiu vahe mani'none nehutma, Anumzamofu kasegemofonte manineta, Anumzamo'ene tragoteta mni'none hutma tamagra tamavufa erisaga nehaze. <sup>18</sup>Tamagra Agri'ma avesinea zana inazamo fatgo higeno,

havizana hune ko antahinaze. Na'ankure agri kasegema korapa rempi huramigeta antahi'naze. <sup>19</sup>Tamagra zamavu asuhu vahe'mokizmi kama zamaveri nehuta, hanimpima mani'naza vahe'mokizmi tavi mni'none huta nehaza zankura, knare'za nehune hutma nehaze. <sup>20</sup>Tamagra tamagesama antahizana vahe'mo'zama neginagi avu'avaza nehaza vahe'mokizmi kana zamaveri nehune nehuta, mofavremokizmi Anumzamofa kana rempi hunezamune huta nehaze. Na'ankure Anumzamofa kasegefina, knare antahizane tamage'zana antahi vgare'none huta nentahize. <sup>21</sup>Tamagrama vahe'mokizmi rempi hunezamita, hagi nahigeta tamagra'a rempi huta nontahize? Tamagra musufa oseho huta nezmasamize. Hianagi tamagra'a musufa nosazo? <sup>22</sup>Tamagra ru venenene anene monkoza osiho huta nehazanagi, tamagra'a anazana nosazo? Tamagra havi anumzante mono huonteho nehuta, mono nozmifintira kumzafa nosazo? <sup>23</sup>Tamagra kasegema antahinaza zankura tamufga erisaga nehaze. Hu'neanagi kasegema rutagrazana Anumzamofona ra agi eri haviza nehaze. <sup>24</sup>Na'ankure avontafepima hu'neana, ***Megi'a vahe'mozama Anumzamofa agima huhavizama nehazana, na'ankure tamagrama haza avu'ava zante anahu kea nehaze*** hu'ne. (Ais 52:5, Izik 36:20)

<sup>25</sup>Na'ankure Jiu vahe'motma tavufga tgahu tamavutamava zamoma knarema hanie hanutma, kasegemofa amagama antesageno'e. Hianagi kasegema rutagrenageno'a tamavufga taga nehaza tamavutamavazamo'a amne'zankna hugahie. <sup>26</sup>Hagi megia vahe'mo'za zamavufga taga osune'za, Anumzamofa kasegema amagama'antesazana, zamufga taga osu'naza zamo'a zamufga tgahu vahekna hugahaze. <sup>27</sup>Tamage amega avufga tga osu, megia vahepinti iza'o Anumzamofa kasege amagama antesimo, Jiu vahe oku tamavufga tga hu'nesaza vahe'mota Anumzamofa kasege amage nontesaza vahe'motagu keagafi manigahaze hu'za hurmantegahaze. <sup>28</sup>Hu'negu tamagra tamage Jiu vahera omani'naze. Na'ankure Jiu vahe'mo'zama kasenermante'za oku tamavufga tgama hurmante'naza zamo'e. <sup>29</sup>Tamage Jiu vahema mni'nakuma hanuza, kasegemofa amage antegahaze. Tamage oku avufgama tga huzana agu'afi tumo'amofa Anumzamofa Avamumo erifore hugahianki, amega avufgare erifore osugahie. E'inama nehaza vahe'mo'za vahe'mofa tegatirompage, Anumzamofontegati ra zmagima erisaza zanku nehakaze.

### Anumzamofa fatgo avu'avazamofa naneke

**3** <sup>1</sup>Jiu vaherema nehazana, nankna knare'za eriforera nehaze? Hifi oku'a tavufgama tgahu tavutava zampintira na'a taza hu'zana enerune? <sup>2</sup>Anampina rama'a tamaza hu'za me'negeta enerize! Ese zana Anumzamofa oku me'nea ke'a Jiu vaheku antahiramino eri'ama hu'ne. <sup>3</sup>Ana hanigeno mago'amo'zama zamentintima osanageno'a, ana zamentintima osnazazamo'a, Anumzamo'ma huvempa hu'nea ke'a

rufutagigahifi? <sup>4</sup>I'o, Anumzamoke fatgo hu'neanki, maka vahe'mota havige vahe mani'none. Avontafepima krente'neana ***Kema hananana vahe'mo'za tamage hu'za nehnagenka kegagare kavrentesazana zamageteregahane*** hu'ne. (Sam-Zga 51:4)

<sup>5</sup>Hianagi tagri fatgo osu tavu'tavazamo'ma, Anumzamofu fatgo avu'avazama eri fore'ma nehanigeta, tagra na'ane huta hugahune? Anumzamoma rimpaheranteno knazama tamisiana, e'i fatgo avu'ava hugahifi? (Vahe'mota antahintahire, ama'ina kea nehue.) <sup>6</sup>I'o, Anumzamoma fatgoma osu'nesuno'a mopafi vahe'ene mikozana refko huga osu'neankino, inankna huno refko hugahie? <sup>7</sup>Nagri havigemo'ma Anumzamofu fatgo avu'avazampine masa'afima eama hanigeno'a, na'ante Anumzamoma kumi vahe mani'nane huno hugahie? <sup>8</sup>Hagi mago'amo'za tananke nekafricanakna hu'za kegaga zamifintira kea nehu'za, mago'ane kumira nehanunkeno knare'za efore hanie hu'za nehaze. Iza'o e'inahukna nanekema nehanimofona kna erinogu nehie.

#### Miko vahera kumi vaheke mani'naze hu'nea naneke

<sup>9</sup>Na'ane huta hugahune, tagra Jiu vahe'mota mago'a nagara zamagetereta knare hu'none hugahumpi? I'o, na'ankure tagra ko ana miko Jiu vahero, megia vahera kumimofu hankavemo refitezmantenegeta zamageta antahita hu'none. Hagi Jiu vahe'mota ru vahera zamageterenompia?

<sup>10</sup>Avontafepi krentenena, ***Magora fatgo vahera omanine. Magore huno omnitfa hu'ne.*** <sup>11</sup>***Magore huno amanahu antahizane vahera omanine. Mago'mo'e huno anumzamofonkura nohakre.*** <sup>12</sup>***Miko vahe'mo'za zamagena hunemi'za, ana miko'mo'za haviza nehaze. Magore huno knare'za nehia vahera omanine. Magore huno omanitfa hu'ne.*** (Sam-Zga 14:1-3) <sup>13</sup>***Zamagerumo'a neginagi huno mati kerigamo hagaro hurianakna nehie. Zamagefunafina havigemo avite'ne. Ha' osifavemofu avuatga zama'amo zamagitera me'ne.*** (Sam-Zga 5:9)

<sup>14</sup>***Zamagitera vahema sifinama huntezane, aka kegagamo avite'ne.*** (Sam-Zga 10:7) <sup>15</sup>***Vahe'ma zamahe fri zantera ame'ama nehaze.***

<sup>16</sup>***Inantego vazana vahe'ma zamazeri haviza hu'zane vahe'mofoma knama amizamo nezmavararie.*** <sup>17</sup>***Inankna hu'za zamarimpa frua erigahaze zamagra ontahinaze.*** (Ais 59:7-8) <sup>18</sup>***Anumzamofonku koro hu'zana nomane.*** (Sam-Zga 36:1)

<sup>19</sup>Tagra antahi'none kasegama krente'nea kemo'a kasegema eri'naza vahe nezmasamie. Ana hanigeno mago'mo'a huno nagra ftago vahe mni'noe huno osugahie. I'o miko mopafi vahe'mota Anumzamofu avurera hazenketi me'nea vahe mni'none. <sup>20</sup>Na'ankure kasegemo'ma hu'neazama avarari zampintira, Anumzamofu avufina mago vahe'mo'a fatgo vahe mani'noe huno osugahie. Na'ankure kasegemo, kumimofu keno antahino huzana erifore nehie.

### Tamentintimo hanigeta fatgo vahe manisuna naneke

<sup>21</sup>Hu'neanagi menina Anumzamofa fatgozana, kasege amage'ante zantetirompage, kasefa ka taveri hu'ne. Korapama Mosesema krente'nea avompima huvempa nehigeno, kasnampa vahe'mo'za hu'naza kante efore nehie. <sup>22</sup>Tagrama fatgo huta Anumzamofa manisuna hanuta, Jisas Kraisine tamentintia hanunkeno, Anumzamo'a fatgo vahe mni'naze huno hurantegahie. Mago kana omnetfa hu'ne. I'o. <sup>23</sup>Na'ankure maka'mota kumi huta Anumzamofa hanave'ane kumapina umanigara osuta, atupa hu'nonane. <sup>24</sup>Anumzamo'a knare erizama asuragiranteno Kraisiimpi eri'nea zanteti, tamagra fatgo vahe mani'naze hu'ne. Agra e'i anazana Kraisiimpi miza seranteno katufegeta, kumipintira fru huta mani'none. <sup>25</sup>Anumzamo'a, Jisasina tamigeno kumitimofa nona huno korama'a tagino, kumitia apaserante'nea zamo'a Anumzamo'a agru huno fatgo huneankita, Agritema tamentinti hanuta Anumzamofontera egahune. Anumzamo'a e'inhahu hu'neazamo, Anumzamo'a fatgo hu'ne nehie. Ko'ma kumi hu'naza vahe'ma akoheno mni'nenokumizmia atrezmante'nea zamo'a eama hu'ne. E'ina zamo'enena eriamahuno Jisasimpima zamentintima haza vahe'ma nezmavrea zamo'a taveri huno Anumzamo'a fatgo hu'ne nehie. <sup>26</sup>Na'ankure e'i anazama hiazanteti, Agra'a fatgozana meni knafina eriamahune. Hanigeno kumi vahe'mo'za fatgo vahe mni'naze haniana, e'i Jisasi Kraisiimpima zamentinti hanaza vaheku Anumzamo'a fatgo vahere huno huzmantegahie.

<sup>27</sup>Tagra naza hunonkeno Anumzamo'a tavrenegu tavufga erisaga hugahune? Kasegema amage'ma ante avu'avazamopi? Knare erizama e'nerunazamo'o? I'o. Tamentintima hu'zamo tavufama erisaga hu'zana agaterene. <sup>28</sup>Tagri'ma tazeri knarema higeta Anumzamofa avure'ma fatgo hunonana kasegema amage'ante zampitiro'ompge tamentintima hunkeno tazeri fatgo hu'ne. <sup>29</sup>Agra, Jiu vahe'mokizimi Anumzanke mani'nefi? Agra megia vahe'mokizimi Anumzanke maninefi? I'o, Agra ana mikomota Anumza mani'ne. <sup>30</sup>Zamufga taga hu'naza vahe'ene, zamufa taga osu vahe'mofona, Magoke Anumzanke mani'neankino, zamentintima haza vaheku fatgo vahe mani'naze nehie. <sup>31</sup>Hagi tagra tamentintiguke nehuta, kasegegura amnezane hugahumpi? I'o, tagrama tamentintima hanuta kasegemofona tamage huta avariri fatgo hugahune.

### Abrahamu amentinti higeno Anumzamo'a fatgo nere huno hu'nea naneke

**4** <sup>1</sup>Abrahamu'a tagrikna vahe mni'nenokumizmia, neregeho mni'neaki, na'ane huta hugahune? <sup>2</sup>Hagi agri erizamoma hanigeno fatgo hu'noe huno Abrahamu'a avufga erinte mrrerigahie. Hu'neanagi Anumzamofa avurera knarera osugahie. <sup>3</sup>Na'ankure avontafemo'a anage huno hu'ne,

***Abrahamu'a Anumzamofonte amentinti higeno, Anumzamo'a fatgo nere huno Abrahamunkura hu'ne.*** (Jen-Agf 15:6) <sup>4</sup>Vahe'mo'za eri'zama enerizana muse'za zmisazegu e'norezanki, miza erinaku enerize <sup>5</sup>Hu'neanagi vahe'mo'za eri'za eri'zazantera Anumzamo'a fatgo vahere huno hunozamante, hu'neanagi Anumzamo'a kefozanti eritrene hu'za zamentintima hazageno, fatgo vahere huno hunezmante. <sup>6</sup>Deviti'a anahukna huno ama anazanku nanekema hu'neana, Anumzamo'ma kumi vahekuma fatgo vahere huno hu'nea asomu kema hu'nea nanekefina huno, <sup>7</sup>***Anumzamo'ma magomofu hazenke zama'ane, kumi'ama atrentesimo'a muse hiho.*** <sup>8</sup>***Kumi hu'nesia zankuma ramoma kumi hu'ne huno osaniazankura muse hino.*** (Sam-Zga 32:1-2)

<sup>9</sup>Ama ana asomura Jiu vahe'mofo zanke me'nefi, oku zamavufga taga osu megi'a vahe'mokizimi zanene? Tagra Abrahamunkura, Anumzamo'a fatgo nere huno hu'ne huta nehune. Na'ankure agra amentinti hu'negenoe. <sup>10</sup>Hu'neanagi inankna higeno anazana efore hu'ne? Agra oku avufga tga hutegenofatgo nere huno hu'nefi, oku avufga tga osu'negenoe? Ana hu'neankita hufra okigosune. Abrahamu'a oku avufga tga osu'negenofatgo nere huno huno huntene. Oku avufgama tga hu'zana amentinti huzamofofatgo nere huno huntene. Oku avufgama tga osunere anagea huntene. E'ina hu'neagu oku zamavufga tga osu vahe'mo'za zamentintima haza vahe'mokiziminena, Anumzamo'a fatgo hu'naze huno huzmantesigeno, Abrahamu'a avamupina nezmazafa hugahie. <sup>12</sup>Anazanke huno oku zamufga tga hu'nazamo'za Abrahamuma oku avufga tga osu'nenofatgo nere huno hu'neakna hu'za zamentinti hanaza vahe'mokizimia, Abrahamu'a avamupina nezmaza mani'ne.

#### **Zamentintima nehaza vahe'mokizmigu huvempa kea huzmante'nea naneke**

<sup>13</sup>Na'ankure Anumzamo'ma Abrahamune agehe'mokizimi huvempa ke huzmanteno, ana miko mopa zami'neana Anumzamofokasege amage antezantero ozami'ne. Hianagi Anumzamo'enema amentintifimafatgo huno mania zante ami'ne. <sup>14</sup>Hagi Anumzamo huvempa huzmante'nemo'za kasege avriri zampinti huvempa huzmante'neazama erizasina zmentinti hu'zamo'a nena rga'a oregeno, huvempa hu'nea kemo'enena amne'za sesine. <sup>15</sup>Hu'neagu kasege'mo'a arimpahe'za avreno ne-e. Hianagi kasegema omneresina kasegema rutagre'zana omanesine.

<sup>16</sup>E'ina hu'neagu Anumzamo huvempa huzmante'neazana zmentinti haza vahe'mo'za enerize. E'i ana musezana Mosese kasege amage nentesio, nontesio Abrahamuma hu'neankna amentintima hanimo erigahie. Hu'neagu Abrahamu'a ana miko zamentini vahe'mokizimi nezmazafa'e. <sup>17</sup>E'i ana zanku avontafepina Anumzamo'a asamino, kagra



rama'a vahe'mokizmi nezmafaza hugahane hu'ne. E'i anazama fore hu'neana na'ankure Anumzamo'a fri'naza vahera zamasimu nezamino, hakarea'zana Agra erifore hu'ne huno Abrahamu'a amentinti hu'nea zantere. (Jen-Agf 17:5) <sup>18</sup>Amentintima huzamofona amuha hu'zana omaneanagi, Abrahamu'a ana miko vahe'mokizmi nezmafana manigahue amentinti azeri hankavetinegeno, Anumzamo'a negeno fatgo nere huntene. *Kagehe'moza hakare hanageno hamprigara osugosie* hu'ne. (Jen-Agf 15:5) <sup>19</sup>Abrahamu'a 100 ti'a kafuzge maniteno keana avufgamo'a mofavre eri fore huga osigeno, Sara enena tvavateno mofavre ksentega osu'neanagi, Abrahamu'a amentinti hu'neazana otre'ne. <sup>20</sup>Anumzamo'ma huvempa hunte'nea zankura Abrahamu'a tare rimpa osu'neanki, amentintimo'a mago'ane hankavenetigeno anazamo'a Anumzamofona ragia ami'ne. <sup>21</sup>Anumzamo'a huvempama hunante'neazana amane hunantegahie huno rimpa fru Abrahamu'a erine. <sup>22</sup>E'ina hu'negu Abrahamuma amentinti hu'nea zanku, Anumzamo'a fatgo nere huno huntene. <sup>23</sup>Anumzamo Abrahamunku fatgo nere huno hunte'neana, agrake azahu'za erisia zanku huno kreonte'neanki, <sup>24</sup>tagriku enenku huno krente'naze. Jisasi'ma fri'nefinti azeri oti'nea Rantimofonte tamentinti hunentonkeno, Anumzamo'a tazeri agru hunerantene. <sup>25</sup>Na'ankure tagri kumiku Jisasina atregeno efri'nemofa azeri oti'nea zamo, Anumzamofa avurera tagrira tazeri fatgo vahera se'ne.

#### Anumzamo fatgo vahere huno nehiazamofa naneke

**5** <sup>1</sup>E'ina hu'negu tamentinti hanuta Anumzamofa avufina fatgo vahera manigahune. Na'ankure Jisasi Kraisi Rantimoma hu'nea zamo higeta, tagra Anumzamo'enena trimpa fru huta nemanune. <sup>2</sup>Na'ankure Kraisiimpi tamentinti hu'nazamo tavreno amama mreri agatere'nea kumapi efregeta menina otineta, hankavea e'nereta, Anumzamo'ma msazama'anema esigura avega ante'nonazamo higeta musena nehune. <sup>3</sup>Tagrama knafima ufresuta muse hanune. Na'ankure tagra antahi'none, e'i ana knazampina knare hu'neankino taza hanigeta oti hanavetineta ana knazama enerita kazigazi huta vugahune. <sup>4</sup>Knazama erino kazigazi huno vu'zamo'a tavutava fore higeno, ana zamo'a Anumzamo tavregahie amuhazana eriamana nehie. <sup>5</sup>Hagi amuhama humita avega anteta mani'nona zamo'a, amuhama hu'nazana erinotre. Na'ankure tagra antahi'none Anumzamo'ma Ruotge Avamu tamigeno, avesizama'a Ruotge Avamu'afi huvazino tagu'afi eritagi avinete.

<sup>6</sup>Tagrati'a taza hugara osu'nonkeno, Kraisi'a kumitigura kna fatgo'are efri'ne. <sup>7</sup>Tamage mago'mo'a fatgo vahekura frisanue huno osugahie. Hagi mago'mo knare'ma hanuno'a, amne knare vahekura frigahie. <sup>8</sup>Hianagi Anumzamo'a tusiza huno avesirantenea zama eriamana hu'neana, kumi vahe mani'nonkeno Kraisina huntengeno, tagri kumiku huno efri'ne.

<sup>9</sup>Hagi Kraisi koramo sese hurantegeta, Anumzamofu avurera fatgo vahe mani nonankino, tamage huno Anumzamofu rimpa hezampintira tavu'vazigahie. <sup>10</sup>Na'ankure Anumzamofu ha' vahekna huta mni'nonkeno, Nemofo frizampi Anumzamo ete mago'ane tazeri mago hu'ne. E'ina hu'neankino Anumzamo'ma rimpa herante'nea zampintira Kraisi asimuteti, tagri'ma taza huno tagu'vazizana erigahune. <sup>11</sup>Hu'negu Rantimofu Jisasi Kraisimpi Anumzamofu musena huntegahune. Na'ankure Rantimofu Jisas Kraisimpi ete mago'ane, Anumzamo'a tazeri mago hu'ne.

### Adamu'ne Kraisi'gizni naneke

<sup>12</sup>E'ina hu'negu magoke ne'mo kumi higeno, ama mopafina kumimo'a efre'ne. Kumimo'a friza avareno egeno, frizamo'a ra huno maka vahetera vuno eno hu'ne. Hu'negu maka vahera kumi vahe mni'none. (Jen-Agf 3) <sup>13</sup>Kumimo'a ama mopafina ko efore hutegeni, henka kasegea zamine. Na'ankure kasegema omneneresina, e'i kumi nehaze huno huozmantesine. <sup>14</sup>Hianagi fri'zamofu hanavemo'a Adamu knaretima eno Mosese knarema ehanati'neana meno e'ne. Adamu hu'neakna kumi osu'nazanki, frike'za hu'naze. Adamu'a henkama Kraisima esia Ne'mofu avame'za efore hu'ne.

<sup>15</sup>Hu'neanagi Adamu kumimo'ene, Anumzamofu knare musezamo'enena magoknara osu'ne. Na'ankure magoke ne'mofu Adamu kumimo frizana rama'a vahetera avareno ege'za fri'naze. Hianagi Rana Anumzane, mago nera Jisas Kraisimpi knare asunkuzane kumiti apase atrerante zana tamine. <sup>16</sup>Asunkuzama'afi Anumzamo tami'nea musezamofu raga'amo'a mago ne'mo'ma kumi'ma hu'nea zamofu raga'agnara osu'ne. Na'ankure Adamu kumimo knaza avareno e'ne. Hianagi Anumzamo'ma amne tami'mea musezamo, Anumzamofu avurera tazeri agru hune. <sup>17</sup>Na'ankure magoke ne'mo Adamu kumi higeno, agri kumite fri zamo'a vahera kva'gri zamanteno e'neanagi, Anumzamofu asuntgi'zane fatgo musezama'afi manisamo'za fri zamofone kumimofu hanavea magoke Ne' Kraisi Jisasimpi azeri ageteregahaze.

<sup>18</sup>Magokemo Adamu hu'nea kumimo maka vahe'mofontera knazana erino e'ne. Hianagi magoke ne'mo Kraisi fatgo avu'ava hu'neazamo tazeri agru higeta, Anumzamo'enena fatgo huta nemanita, kasefa manizana hakaremota eri'none. <sup>19</sup>Magoke ne'mo ke hantagi'nea avu'avazamo higeno, rama'a vahe'mofu kumi vahere huzmante'ne. E'ina kante magoke Ne'mo ke erizafa hu'nea avu'ava'zamo rama'a vahera zmazeri fatgo vahe tro huzmantegahie. <sup>20</sup>Anumzamoma kasegema zami'neana miko vahe'mo'za kumima nehazaza kesazegu zamine. Hianagi vahe'mo'zama rama'a kumima hzageno'a, Anumzamofu knare asunku'zamo'a mago'ane rama'a nehie. <sup>21</sup>Ana hukna huno kumimo miko

vahera kegva hu'нено fri'zana avrezamigeno, menina Anumzamofoknare asunku'zamo fatgo avu'avazana eritamisigeno, Jisas Kraisi Rantimofompinti manivava asimura erigahune.

### Kumimofokhankave eritre'nea naneke

**6** <sup>1</sup>Hagi tagra na'ane huta hugahune, mago'ane kumira nehanukeno Anumzamo'a asunku hurantevava hugahio? <sup>2</sup>To anara osufta hugahie. Tagra kumi'ma huzampina ko fri'none, nahigeta kumipina manita neone? <sup>3</sup>Hifi Jisas Kraisi enema mikamota hagerefitamono ti freankna huta friteta, oti'nazana tamagra ontahinazo? <sup>4</sup>E'ina hu'negu tagra monotima fronzamo'a, Kraisi ene frunke'za aserente'naze nehie. Hagi Kraisima fripintima azeri oti'neaza huno, Nefa'a Agra'a hankave'anufripintira tazeri otine. Higeta tagranena kasefa manizampi mni'none.

<sup>5</sup>Tagrama Kraisi ene hagerafita frinonema hanuta, anahukna huno tagri'enena tazeri'otisigeta tasimura erigahune. <sup>6</sup>Tagra antahinone kumitavutavazana Jisasi'ene rugeka zafare hantigeno, kumimofokhankavea tagripintira eritrene. Tagra mago'ane kumimofokazokzo eri'za vahera omani'none. <sup>7</sup>Na'ankure iza'o fri'nemo'a, kumimofokinafintira katufentegenofru huno mni'ne. <sup>8</sup>Hagi tagra Kraisi'ene frisuta, tamentintima hunana tagranena Kraisi'ene manigahune. <sup>9</sup>Tagra ama ana zankura antahi'none. Na'ankure Kraisi'a fripintira oti'neankino, mago'anena ofrisigeno fri'zamo'a kegva huontegahie. <sup>10</sup>Agra magoke zupa frino kumimofokhankave eritrene. Hu'neanagi Agra menina asimuerino mni'neankino, ete mago'enena ofrigahie. <sup>11</sup>Hagi tamagra 'a refkohuta antahiho, ko kumimofokhankavefintira fri'none huta nehuta, Kraisi Jisasimpi, Anumzamo'ene kasefa huta mani'none huta hiho.

<sup>12</sup>E'ina hu'negu atrenkeno amega tmavufgamofona kumimo'akvagrrioramantena, tavufgamofohavi avesizana ovaririho. <sup>13</sup>Atrenkenomago tmavufgamo kumimofokeri'zana e'norina, Anumzamofotamavufgami vgareho. Na'ankure tamagra ko fri'nazane, hu'neanagi menina kasefa maniza erita mani'naze. Hagi ana miko tamavufgamo'a knare'zama eriforehu erizaza me'nenkeno, Anumzamofona rami amino. <sup>14</sup>Na'ankure kasegemofogorga'a omni'naze. Hagi Anumzamofosuntgi zamofogorga'a mni'nazagu, kumimo'a kva huormantegahie.

### Fatgo avu'ava zamofokazokzo eriza vahe manisune hu'nea naneke

<sup>15</sup>Mago'ene kasegemofokvafina omni'none. Anumzamofokasunku'zamo tazahu'ne. Ana hu'negu mago'ene kumira hugahumpi? A'o, ana osugahune. <sup>16</sup>Tamagra amage antegahune hanazazamofokazokzo eri'za vahe'ma mni'nazana ontahinazo? Tamagra amne kumimofokazokzo eri'za vahera manigahazanagi, ana zamo fri kante tamavrenovugahie. Anumzamofomage antesutma fatgonomaniza erigahaze.

<sup>17</sup>Anumzamofona muse huntého, korapara kumimofó kazokzo eri'za vahe mani'nazanagi, menina tamagu'areti rempima huramuazana amage'nentaze. <sup>18</sup>Menina kumimofó kazokzoma hu' kinafina omani'naze. Hagi tamagra fatgo zamofó kazokzo eri'za vahe mani'naze. <sup>19</sup>Na'ankure vahe'motama kefo tavu'tvama nehunazante, nagra antahintahitamia eriana hu'naku kazokzo eri'za vahete ene kva vahetera hunte'na nehue. Korapara kasege ha'nentagita agru huno avu sese osu tamavutamava huta vu'nazanagi, menina atretma fatgozamofó kazokzo eri'za vahe nemnita, agru nehutma ruotge huta manigahaze.

<sup>20</sup>Hagi kumi'mofó kazokzo eriza vahema mni'nazageno'a fatgo avu'ava zamo'a kina reormantenie. <sup>21</sup>E'ina hu'negu nankna tamazahuza erinaze? Ko'ma hu'naza tamavutamava zamo'a menina tamagaze nehie. Ana avu'avazamo'a friza erifore nehie. <sup>22</sup>Hu'neanagi menina kumimo'a kina reoramantegetma Anumzamofó kazokzo eri'za vahe'a mani'nazageno, e'i ana avu'avazampinti tamazahu'zana enerizageno, sese huramanteno tamazeri ruotage huno, manivava tamasimu tamamigahie. <sup>23</sup>Na'ankure kumimofó mizana fri'zane. Hu'neanagi Anumzamofó muse'zana, Kraisi Jisasi Rantimofompi mago'za hunterompge, amne manivava asimura tamine.

### Kasegemo kina reorantesia naneke

**7** <sup>1</sup>Nenfugtane nasaraheta, tamagra ko kasegea antahita keta hu'nazanki ontahi'nazo, asimuma erino mani'nea vahera kasegemo kegva huntégeno mni'ne. Hagi frisigeno'a kasegemo'a kegva huontegahie? <sup>2</sup>Hu'neanagi avame kema huntena hanuana, mago a'mo'ma vema erisigeno'a, ana a'mofona kasegemo kina rentesigeno, nevema asimuma erinoma maninesigeno'a neve'ene manigahie. Hianagi nevema frisigeno'a, ana kasegemofó kinafina omnigahie. <sup>3</sup>Hagi neve'ma ofri mani'nesnigenoma ru vema erisiana agra monko avu'avaza hugahie. Hagi nevema fri sigeno'a kasegemo'a kina reontegahiankino, ru vema eri'sniana monko avu'avazana osugahie.

<sup>4</sup>E'ina hu'negu, nafuhetane nasaraheta tamagra Jisasi'ene tragotaza zamo'a ko Jisasi'ene frita, kasegemofó agorga omni'naze. Hagi menina Jisasi'ma ko fripintima azeri otinemo'ene erimago huta Anumzamo'ma avenesia avu'ava zana hugahune. <sup>5</sup>Kumi tavutavamo kegva hurantenegeno'a, kumima hu' tavesizamo'a tagu'afina efore nehie. Hagi kasegemo'a havi tavutvamofó avesiza azeri otigeta, kumira hunkeno frizana avreno ne-e. <sup>6</sup>Hu'neanagi tagra ko kasegemofó kinafintira katuferantegeta fru huta mni'none. Na'ankure Kraisi'ene frunkeno mago'ene kasegemofó kinafintira tavre'ne. Hianagi menina amne Anumzamofó erizana erinenteta, korapa tavutva huta kasegefima krente'naza kemofó amage' antezanopage, Avamumofó kasefa kante vugahune.

### Kumi'enema ha'ma huzamofa naneke

<sup>7</sup>Hagi na'ane hugahu'ne, Nagra kasegemo'a kumi me'ne nehufi? I'o. Tamage kasegea kumira omnene. Hianagi kasegemo kumira tamaveri nehie. Nagrama rumofa zankuma kenunu huzana, kumire hu'na antahi ama osuanagi, kasegemo eriana higena keama nehue. <sup>8</sup>Hianagi kumimo'a ama ana kasegefinti kankamunku keno tavu masevemahu tavesizana, tagu'afina erifore nehie. Kasegema omnesigeno'a kumimo'a hankave'a omanesigeno frigahie. <sup>9</sup>Kasegema ontahinorera nasimu erina mni'noane. Hianagi kasegema egeno'a kumimo'a asimu erino mni'gena nagra fri'noe. <sup>10</sup>Ana kasegemofo eri'zana vahemofa asimu ami'zanagi, nagra kasegefintira nasimura e'noruaniki, kasegemo'a nahenefrie.

<sup>11</sup>Na'ankure, kumimo'a kasegefinti kankamura'a keno erifore huno renavatga higeno kumimo'a nahe frine. <sup>12</sup>Hianagi kasegemo'a ruotge higeno, kasegema hunte'neana ruotage huno fatgo huno knare hu'ne.

<sup>13</sup>Hianagi inankna hugahie, kasegema knarezane nehuazamo nahe nefrifi? I'o, kumi'mo'a knare zampinti frizana erifore nehie. Hu'negu kumimo'a haviza hu'ne huno Anumzamo'a eritaveri higea negone.

<sup>14</sup>Hu'negu, kasegefina hazenkea omanene, na'ankure mopare navufga erina maninogu kumimofa kazokzo eri'za vahe' mizante atreankna nehie. <sup>15</sup>Nagra'ama nehua navunavara kena antahina nosue, na'ankure nagra fatgo zama hunakurema huazana nosue. Hianagi navesarama huntana osugahue huna huaza nehue. <sup>16</sup>Hianagi nagri'ma navenosia zama hanuna, Anumzamofa kasegemo knare hu'ne hugahue. <sup>17</sup>E'ina hu'negu nagrani'a kefozana nosuaniki, kumimo nagu'afi me'nenana kefozana nehie. <sup>18</sup>Higena nagra antahi'noe, knare zana nagu'afina omanene. Knare zana hu'nakure huna nentahuanagi anazana hugara nosue. <sup>19</sup>Nagrama knare'zama hugahue'ma huazana nosue, hagi havi'zama osugahue huaza nehue. <sup>20</sup>Hagi menima osnuema huazama nehnuna, e'i nagrani'a nosue. Hianagi nagu'afi kumimo me'nenana anazana erifore nehie. <sup>21</sup>E'ina hu'negu nagrama kasegema koana, fatgo zama hunakure huazana kumimo tvaonire me'neankina ana zana nosue. <sup>22</sup>Nagra Anumzamofa kasegea ana miko nagu'areti navesinentoe. <sup>23</sup>Hianagi nagu'afina ru kasege me'nea zamo antahintahini'anena hara nehie, e'i ana kasegemo nagu'afi me'nenana nazeri kumi'mofa kasegere kina vahe'nenante. <sup>24</sup>Nagra haviza huna keforenoanki, iza ama fri navufga naza hugahie? <sup>25</sup>Nagra Jisas Kraisi Rantimofompi Anumzamofona muse huntone, Anumzamofa kasege antahintahiniareti amage nentuanagi, amega navufgamo'a kumimofa kazokzo eri'za e'nerie.

### Jisasi'a kefo zanti eri fanane nehuno, Ruotge Avamu tmi'nea naneke

**8** <sup>1</sup>Ana hu'negu menina Kraisi Jisasi'ene hagerfi'naza vahera, havi vahere huozamantegosie. <sup>2</sup>Na'ankure Jisas Kraisiimpi asimuma

ami Avamumofu kasegemo, kumimofone fri'zamofu kasegefintira kazuferamantene. <sup>3</sup>Mosese kasegemo'a tazahugara osu'ne, na'ankure amega tavufgamo kumike hianagi, Anumzamofu'a tazahunaku ru kankamu retro huno Agra'a Mofavre tamigeno mopafi avufga erino tagrikna hu'neanagi, Anumzamofu Agra'a Mofavre museza tamigeno kumimofu hankavea ahe fanane hu'ne. <sup>4</sup>Fatgo huta kasegemo hu'neankante manisunegu Anumzamofu'a anazana hurantene. Higeta menina tagra ko'ma kefozama nehunazana netreta, Ruotge Avamumofu avesizante nevune. <sup>5</sup>Mopafi zamufga'mofu avesizama nevririzamokizmia, antahintahiza zmimo'a mopafi zama huzankuke nentahize. Avamupima nevaza vahera Avamumofu zankuke nentahize. <sup>6</sup>Hu'negu ko'ma kumima nehuna tavutava zanku'ma antahizamofu'a fri kante tavreno nevie. Hianagi atrenkeno Avamumofu antahintahitamia kva huramantena asimu erino rimpa frune manizampina viho. <sup>7</sup>Hu'negu iza'zo kumimofu avu'ava zampima mani'namo'za Anumzamofona ha' renentaze. E'inahu antahintahine vahe'mo'za Anumzamofu kasege agorga'a nomaniza, Anumzamofu kasegea amagera antegara osu'naze. <sup>8</sup>E'ina hu'negu kumi avu'avazampima mani'naza vahe'mo'za Anumzamofu avu'avara nosaze. <sup>9</sup>Hu'neanagi kagrira kumi kavukavazamo'a kava hunogante. Hagi Anumzamofu Avamumofu kva hunegante. Tamage huno Anumzamofu Avamu'mo tamagu'afima mani'nenketa, Avamumofu kvafi manigahaze. Antahiho, Kraisi Avamumofu zamagu'afima omani'nenimo'za, Kraisi vahera omani'naze. <sup>10</sup>Kumimo amega tamavufga tamahe frigahianagi, Kraisima tamagu'afima maninesnigeta tamasimu erita fatgo vahe manigahaze. Na'ankure Anumzamofu tamavrene. <sup>11</sup>Hagi Anumzamofu Avamu'mo Jisasi'ma frinefinti' azeri oti'nea Avamu'mo'ma tamagu'afima mni'nesnigeno'a, Kraisima fripinti azeri oti'neaza huno tamagu'afina ana avamu mani'neankino, amega tamavufgamofona asimu amigahie. <sup>12</sup>E'ina hu'negu knare nefutane nasarahete, mopafi tavufgamofu avesizana oviritfa hugahune. <sup>13</sup>Hu'negu tamagrama kumimofu avesi avariritma manisnuta frigahaze. Hu'neanagi Avamumofu hanaverema kumi tamavutmazamofu ahefrisuta, tamasimu erita manigahaze. <sup>14</sup>Na'ankure maka veamo'za Anumzamofu Avamuma atrazageno, kama vnazana zmazeri fatgoma nehamo'za, Anumzamofu mofavre mani'naze. <sup>15</sup>Ana hu'negu tamazeri kazokzo eri'za vahe tamanteno tamazeri korohu Avamura tamagra e'orinaze. Hianagi tamagra Anumzamofu mofavre hu Avamu erineta Anumzamofonkura Aba, Nerafa'e nehune! <sup>16</sup>Ruotge Avamumofu tagri avamura taza higeta huama huta, tagra Anumzamofu mofavre mani'none nehune. <sup>17</sup>Tagrama Anumzamofu mofavre mni'nesnuta, Anumzamofu hupri rantenea zamofona Kraisi'ene magoka erisinti haregahune, Kraisi'ma hu'neaza huta knazama erisuta, Kraisi'ene magoka rantagi erita manigahune.

### Henka'a masazamofa naneke

<sup>18</sup>Nagrama nentahuana, menima e'neruna tatazamofona, henka'ama omerisuna masazamo'a ageteretfaza hugahie. <sup>19</sup>Na'ankure ana miko zama Anumzamoma tro'ma huzamante'nea zantmimo'za, henka'ama Anumzamofa mofavremo'zama e'ama'ma hanaza knagura, tusiza hu'za nazupa fore hugahie hu'za avegantaze. <sup>20</sup>E'i anaza tmimo'za zamagra'a zamvesitera mani haviza hu'za mni'neza ome haviza hu'za novaze, hagi Anumzamo hiho hige'za anara nehaze. <sup>21</sup>Ama knare'zama fore hanige'za kesagu nentahize, havi'zama hu'za negasriza kinafintira kazufe'za Anumzamofa mofavre ramimofa mago'zamo kina re'ozmantege'za amne nemniza avasese kuma'afi ufregahze. <sup>22</sup>Na'ankure hago antahinone, Anumzamo'ma maka tro huzmantenea zamo'za, a'nemo'za mofavre ksentenaku hzageno zmata kria kna zmata negrige'za mni'neza ama knarera enehanatize. <sup>23</sup>E'i ana zantamimoke'za zmata e'norizanki, tagranena Anumzamo kumipinti miza serantenemota, Ruotge Avamumofa ese rga'a kna huneta tagua'fina krigi neruta, tusiza huta Anumzamoma tazeri mofavre'a zama hanigura avega nentone. E'i ana zana kinafi tavufgamo mni'neza Anumzamo katufesnigeta fru huta mni'snuna zanku avega nentone. <sup>24</sup>Ama ana zama fore hanigu nentahunkeno tagura nevazie. Hu'neanagi fore hanigu antahintahi hu'zama fore hanigeno kesiana, e'i fore hanigu antahitahi hu'zana omnene. Hagi koma fore higeno ke'nea zankura iza fore hanigeno kesigura nentahie. <sup>25</sup>Hu'neanagi onke'nona zama fore hanigeta kesunku antahintahima nehanuta, agozone huta mni'neta hanavetita avega nentone.

<sup>26</sup>E'ina hukna kante, Ruotge Avamumo hanavetima omnenea vahemota tza nehie. Nazanku nunamuna hugahune, e'i ontahi nonanagi, Ruotge Avamumo Agra'a tagri taza huno nunamu hunerante. <sup>27</sup>Hagi Anumzamo'a vahemota tagu'a negemo Ruotage Avamumofa antahintahia antahine. Na'ankure Ruotge Avamumo'a Anumzamofa avesiza avririno mono vea kevumofonku nunamu hunezmantie.

<sup>28</sup>Tagra antahinone, Anumzamo'a Agri'ma aves'nentamokizmi so'eza zamigu maka zamapina erizana enerize. E'ina vahera Anumzamo'a Agri'a avesi avririhogu zamagi hu'ne. <sup>29</sup>Hu'negu Anumzamo'a korapa antahineno Nemofo kna hihogu huhamprizamante'ne, hanageno Nemofo'a rama'a mofavre nagapina kota mofavre manigahie. <sup>30</sup>Huhamprima nezamanteno'a, Agrite ehogu ke hu'ne, Agra'a fatgo vahere huno hunezmanteno, Agra'a zamazeri antesga huno ra zamagi zami'ne.

### Anumzamofa avesizamo'a oratresnia naneke

<sup>31</sup>Hagi ama ana knare'zama hurantea zankura na'ane huta huga hune? Anumzamo tazama hu'nesigeno'a, iza hara rerantegahie?

<sup>32</sup>Anumzamo'a Nemofona aze'orino makamotagu huno tamineakino, hakarezana tamigahie. <sup>33</sup>Anumzamo'ma huhampri zmantenea vahera iza keaga huzmantegahie? Agra e'i Anumzamo fatgo vahere huno hurantene. <sup>34</sup>Iza huhaviza hurantegahie? Ko Jisas Kraisi'a tagrikura efrino otino Anumzamofona azantmaga kaziga umani'nenno, tagri tagri erino Anumzamofontera nunamuna hunerante. <sup>35</sup>Kraisi avesi zampintira nazamo tazeri atregahie? Tusi'a kna zamopi, amuhoma hurante zamopi, tazeri haviza huzamopi, tatamanegria zamopi, kukenagu atupa hanuna zamopi hazenke zamo'a tagripima Jisasi avesizama me'neana eri otregahie. <sup>36</sup>Avontafemo'a anage hu'ne, ***Kagrikure nehu'za maka kna tahe nefrize. Sipsipi afumofa ananke akafriankna nehaze*** hu'ne. (Sam-Zga 44:22)

<sup>37</sup>Hakare'zana hurantega hazanagi, agatere hankavetia Kraisi avesirante'nemo manine. <sup>38</sup>Nagrama hankave antahintahima nentahuana, frizamo'o, asimu erino manizamo'o, ankeromo'zo, havi avamumozo, meni fore nehza zamozo, henka'a fore hanaza zamozo, mago'a hihamu hankvemozo, <sup>39</sup>amunagumu menesia zamo'zo, fenkagamu menesia zamo'zo, makaza Anumzamo tro huzmante'nea zampinti mago' zamo'e huno Anumzamofa avesizama, Jisas Kraisi Rantmofompi mena avesi zampintira tazeri otregahie.

### Israeli vahe'mo'za Kraisina zamavesra hunte'naza naneke

**9** <sup>1</sup>Havigea nosuanki, Kraisimpi tamage hu'na nehue. Ruotage Avamumo ene nagu'a kenegenama' nagunagesareti ama kea tamage nehue. <sup>2</sup>Tusi'a nasuza enerugeno, tumo niamo'a nata krivava nehie. <sup>3</sup>Na'ankure, nagrima navesiana Anumzamo'a Jekopu nagara z mavresiegu navenesie, Kraisima nagri navesima avaririnigena, nagra nunamuna hanenkeno Agra'a vahepintira nahe natitrena, nenafu'za nagri nona erigahaze. <sup>4</sup>Zamagra Israeli vahera Anumzamo'a zamavrege'za Agri mofavregna hu'naze. Anumzamo zamagripi masazama'a eri ama hu'ne. Agra'a huvempa huno, Agrane zamazeri hagenerefino kasege'a zamine. Agra'a monoma huntasaza kankmuna neramino, knare zama erisuna zanku'ma huvempa hurantenea tamine. <sup>5</sup>Zamagri nezmagehoma zmagima me'nea nagapinti Kraisi'a efore hu'ne. Kraisi'a, Agra Anumza mni'nenno makazamofa aseni mni'negu maka knafina, Agrike agi'a hentesga huvava hugahune! Tamage.

<sup>6</sup>Anumzamo'ma Israeli vaheku'ma huvempa huzamante'nea kea eri raga orenefi? I'o, na'ankure makama Israeli vahepima fore hu'naza vahe'mo'za Anumzamofa vahekera omani'naze! <sup>7</sup>Abrahamumpinti fore hu'naza vahe mani'nazanagi, e'i ana zamo'a zamazeri tamage Abrahamu mofavrea nose. Na'ankure avontafemo huno, Abrahamu'a mago'a mofavre'zga zamante'neanagi, ***mofavreka'a Aisakimpinti kagri***



**vahera fore hugahaze** huno hu'ne. (Jen-Agf 21:12) <sup>8</sup>E'i vahe'mota kasenentona kna huno Abrahamu ksezmanete'nea mofavremo'za, ana miko Anumzamofu mofavregera omni'naze. Hagi Anumzamoma huvempama huzmanete'neo'za, Abrahamu mofavrea mni'naze. <sup>9</sup>Na'ankure Anumzamo'a huvempa huno, **Ama ana knare'ma anaga'a kafurema esu'na, Sera'a ne'mofavre kasentegahie** hu'ne. (Jen-Agf 18:10) <sup>10</sup>E'i ana mofavrea nerageho Aisakie. Hagi Aisaki'a, Rebeka ara erigeno, kugave'za mofavre kaseznantene. <sup>11</sup>Zanagrira kase ozanantenegeke, havizane knare zanena osu'nakeno, ko Anumzamo'a nezanrerana kea asmine. (E'i ana kemo huama huno, Anumzamo agra'a erizakante vahe'mokizimia ko huhamprizmantene. <sup>12</sup>Hianagi knare avu'avazantera keno kea osu'ne.) Neznarerana Anumzamo asmino **Nempu'amo ngana'amofo katoza humigahie** huno hu'ne. (Jen-Agf 25:23) <sup>13</sup>Anumzamofu avontafepi krente'nea kante, **Jekopuna navesinentuanagi, Isona navesra hunentoe hu'ne.** (Mal 1:2-3)

<sup>14</sup>Hagi na'ane hugahune? Anumzamo'a fatgozana nosie huta hugahuno? To anara osugahie! <sup>15</sup>Na'ankure Anumzamo'a amanage huno' Mosesena asmi'ne, **Izano narimpa fru huntenuku humofona, narimpa fru hunentena, izano nasurgintenuku humofona nasurginentoe hu'ne.** (Eks-Uti 33:19)

<sup>16</sup>E'ina hu'negu Anumzamo'a vahe'mota tavesite'ene erizanterompge, Agra'a avesizante asuragirante'ne. <sup>17</sup>Na'ankure Anumzamofu Avontafepina Anumzamo'a Feronkura anage huno asamine, **Nagrama huhamprigantogenka kagrama mani'nanana, agafa'a me'nerere. Na'ankure Nagri hankavemo'a kagripi eama nehanigeno, Nagri nagimofona huama hu'za kokankoka vanageno, ra huno vuno'eno hugahie hu'ne.** (Eks-Uti 9:16)

<sup>18</sup>E'ina hu'negu Anumzamo'a izano asuraginte'naku himofona asuraginenteno, izano rimpama eriginakuma himofona erinegie.

#### Anumzamofu rimpama hezane asuntgizamofu naneke

<sup>19</sup>Tamagra anage huta nagrikura hugahaze. Na'a higeno Anumzamo'a tamagrikura keontahi vahere huno nehie? Agra hugahaze huno hiazana tamagra nehazafi? <sup>20</sup>I'o, e'i anahukna kea osiho. Tamagra izagata, vahetafamota Anumzamofona tro huhaviza hurantene huta nehaze? Tro'ma huntenesia zamo'a, tro'ma huntenesimofona, nahigenka amanahuknara hunka trohunantene huno huntegahifi? <sup>21</sup>Mopa kvoma tro nehanimo'ma, moparetima kvoma tromahunaku'ma hanuno'a, amane magoke moparetira konariri zama ante kvoa tro nehuno, havizama haniazana ante kavo tro osugahifi? <sup>22</sup>E'i ana kanteke Anumzamo'a, rimpahazana eriamana nehuno, hankave'a eriamana hugahie. Hianagi Agra ra zampi akoheno mni'nenono zmazeri haviza hania vahekura zaza knafina

zmaveganente. <sup>23</sup>E'i ana zama hu'neana, Agri'a mrerinea masa'zama eriamu huno asunku'ma huzmantenea vahetera eriamu hu'ne. E'i anazana ko Agra'a retro huzmante'nemo'za erigahaze. <sup>24</sup>Jiu vahepinti'ene, megi'a vahepintima zmavaretere hunefina, tagranena anampina mani'none.

<sup>25</sup>Hoseama kasnampa kema hu'nefina, ***Ru vahekura Nagri vahere nehuna, navesi'ozmantenesua vahekura navesizmantegahue*** huno hugahie. (Hos 2:1, 23) <sup>26</sup>***E'ina hanugeno, tamagra Nagri vahera omni'naze huno zmasmi'nesia kumatera, ksefa huno mni'nea Anumzamofu mofavre'rmine hu'za hugahaze.*** (Hos 1:10)

<sup>27</sup>Kasnampa ne'mo Aisaia Israeli vaheku huno, ***Israeli vahe'mo'za rama'a hu'za hagerinkenafi kasepankna hu'nazanagi anampinti osi'amokizmi Anumzamo'a zmaguvazigahie.*** <sup>28</sup>***Na'ankure Ramo'a fatgo avu'avazampi ame huno maka mopafi vahera refko huzmantegahie.*** (Ais 10:22, 23)

<sup>29</sup>Ko'ma Aisaia hu'nea kante, ***Hihamu'ane Ramo tagehe'mokizmia zmahokeno osia zmatrege'za mni'naze. Anama osuneresina Sodomune Komora kumate vahe'mo'za fanene huvgare'naza kna huta fanene huvgarontesine.*** (Ais 1:9)

#### Israeli vahe'moza zmentinti osu'naza naneke

<sup>30</sup>Hagi na'ane huta hugahune? Megi'a vahe'mo'za Anumzamofu avufi fatgo vahe mani'zankura nohakazanagi, zamentinti hzageno Anumzamo'a fatgo vahe mani'naze nehie. <sup>31</sup>Hu'neanagi Israeli vahe'mo'za fatgo vahe manisunegu mraguzatiza kasegemofu nevaririzanagi, ana zamofona nena'a eriforera osu'naze. <sup>32</sup>Na'a hige'za anara osu'naze? Na'ankure zmagra zmentintia osu'naze. Hianagi eri'zama erisazanteti fatgo vahera Anumzamofu avurera manigahune nehu'za, agigozmi havereti tanafa nehaze. <sup>33</sup>Anumzamofu avontafepi krenteneana anage hu'ne, ***Keho, Saionia vahe'mokizmi zmagigozmi have ante'noankino, vahe'mo'za zmagigo zmite'za tanafa hugahaze. Hagi iza'o Agrite amentinti hanimo'a agzegura osugosie*** hu'ne. (Ais 8:14, 28:16)

#### Amentinti hu'zamo zamahokesia naneke

**10** <sup>1</sup>Nafuhetane, nasaraheta, nagri'ma nagu'afima navenesigena Jiu vaheku'ma Anumzamofontega nunamuma nehuana, zamahokeno zmaza hanigu nentahue. <sup>2</sup>Na'ankure nagra anage hu'na Israeli vahekura huama nehue, Anumzamofona antahimiza avesi avu'avara hanavetiza nevaririzanagi, Anumzamofu antahizana antahi amara hu'za novaririze. <sup>3</sup>Na'ankure Anumzamofu fatgo avu'avazankura nohakrazanki, zamagra'a zmavuzmavateti fatgo zmavuzmavara erifore hugahune nehu'za, Anumzamofu fatgo avu'avazamofu agorga'a nomnize. <sup>4</sup>Na'ankure miko kasegemofona, Kraisi'a emeri knare huvgarene. E'i ana agafare iza'zo

Agrite'ma zamentintima hanamo'za Anumzamofu avurera fatgo vahe manigahaze.

<sup>5</sup>Fatgo avu'avazankuma Mosese kasegemoma hu'nea kante krente'neana, ***Ina ne'mo kasegemoma hu'nea kante fatgo avu'avazama hanimo'a, ana fatgo avu'avazanteti asimu erigahie hu'ne.*** (Lev-Pri 18:5)

<sup>6</sup>Hu'neanagi amentintiretima Anumzamofu avure'ma fatgo huno mani'zankura anage hu'ne, iza monafinka vuno Kraisina tazahinogura avrefenkamia tamigahie hunka kagu'afina ontahio. <sup>7</sup>Hifi iza fri vahe kerifina uramino, Kraisina fripintira avreno mrrerigahie? <sup>8</sup>Hu'neanagi na'ane huno hu'ne? ***Kemo'a tvaonka'are me'ne, e'i ana kea kagipine tumo ka'afine me'ne.*** (Diu-Kas 30:12-14) E'i ana kea amentinti kemofonku tagra huama nehune. <sup>9</sup>Hagi tamagra'ma tamagipinti huama huta Jisasi'a Ramo'e nehutma, Anumzamofu fripinti Jisasina azeri oti'ne huta tamagu'areti tamentinti hanageno'a, tmaguvazigahie. <sup>10</sup>Na'ankure tamagu'areti tamentinti hazageno, Anumzamofu fatgo vahere nehigeta, tamaginuti huama nehazageno, tamahokera nehie. <sup>11</sup>Avontafemo hu'nea kante, ***Iza'o Agrite amentinti hanimofona agaze huontegahie*** hu'ne. (Ais 28:16)

<sup>12</sup>Na'ankure mago'zamo'a Jiu vahe'ene megia vahe'mokigizmi amu'nonpina ruzahura osu'ne. Magoke Ramo ana mikamokizmi Rana mani'neni, Agritegama kezamatiza vahera rama'a asomu hunezmante.

<sup>13</sup>Na'ankure ***iza'zo Ramofu agima ahesaza vahera zmaguvazigahie.*** (Jol 2:32)

<sup>14</sup>Hagi zamentintima hunontesamoza, inankna hu'za zmaza hinogura antahigegahaze. Hagi inankna hu'za Agri agenkema ontehinesu'za zmentintia hugahaze? Hagi agenke ama huamahu vahema omninesigeno'a, inankna huno antahi amara hugahie? <sup>15</sup>Hagi kema erino ome huama hu vahema humaozmante'snage'za inankna hu'za mono kea huamara hugahaze? ***Knare musenkema eri'zama aza vahe'mokizmi zmagamo'a hentofaza hu'ne huno Avontafepi krente'ne.*** (Ais 52:7)

<sup>16</sup>Hu'neanagi ana maka vahe'mo'za knare musenke e'ori'naze. E'inanku kasnampa nemo' Aisaia huno, ***Ramoka iza ama ana kemofontera amentintia hugahie hu'ne?*** (Ais 53:1) <sup>17</sup>E'ina hu'negu vahe'mo'za ke nanenke nentahizageno zamentintia erionetie nehaze. E'i ana kea Kraisi knare musenke me'ne.

<sup>18</sup>Hu'neanagi nagra amanage hu'na nehue. Tamage Israeli vahe'mo'za ana nanenkea antahinafi? Izo zamagra antahi'naze. Anumzamofu avontafepi hu'neana, ***zmagenkemo'a ama mopamofona maka kaziga vuno eno hu'ne. Zamagri kemo'a maka kokankoka vuno eno hu'ne.*** (Sam-Zga 19:4)

<sup>19</sup>Mago'ane nagra tamantahinegoe, Israeli vahe'mo'za antahinira osu'nazafi? Kotazana Mosese'a amanage huno hu'ne, ***Nagra megia***

*vahekuke hanugenka knive regahane. Antahizazmi omnenea vahekuke hanena, krimpa hegahie hu'ne.* (Diu-Kas 32:21)

<sup>20</sup>Hagi Asaia'a hakavetino anage hu'ne, **Nagrikura nohakraza vahe'moza, nagefore hu'naze. Nantahi nogaza vahete Nagra'a eama huge'za nenagaze.** (Ais 65:1)

<sup>21</sup>Hu'neanagi Israeli vahekura amanage huno Anumzamo'a hu'ne, **Nagra hakare zupa zamavrenakura nazana rutaneroanagi, ke'ni'a zamefi hunenamiza namagera nontazage** hu'ne. (Ais 65:2)

#### Anumzamo Israeli vahera avesra huozmantenea naneke

**11** <sup>1</sup>Hagi amanage hu'na nehue, Anumzamo'a Agra'a vahera avesra huzmantenefi? I'o anara osugahie. Na'ankure nagranena Israeli nere, Benjamini nagapinti Abrahamu negehone. <sup>2</sup>Anumzamo'a Agra'a vahe korapa huhampri'zmante'nea vahekino ozmatre'ne. Ontahi'nazafi mono Avontafe'moma kasnampa ne' Ilaijanku'ma hu'neana? Ilaija'a Israeli vahekura amanage huno Anumzamofontega nunamuna hu'ne, <sup>3</sup>**Ramoke, kasnampa vahe'ka'a zmahe nefriza, kre'sramna vu itaraminka'a tgana vazinetre'za, nahe frinaku nagrake mni'noge'za nehakraze.**

(1 Kin 1:10) <sup>4</sup>Hu'neanagi na'ane huno Anumzamo'a ke nona'a huntene?

**7 tauseni'a vahera, Bali havi anumzantera zmarena reza mono huonte'namokizmia zmazeri frakuge'za mni'naze.** (1 Kin 19:18)

<sup>5</sup>E'inahu kna menina hu'ne. Maka Israeli vahe'mo'za Anumzamofona zmagenana humizafinti, osi'a naga Anumzamo'a asuragi zmanteno huhampri zmantememo'za mni'naze. <sup>6</sup>Hagi Anumzamo'ma asunku huzmanteno huhamprima zmantene'sniana, e'i eriza enerizazante anara osu'ne. Hagi eri'za enerizazantema huhamprima zmante'simpga asuntagizamo'a, asuntagizana omnesine.

<sup>7</sup>Hagi na'a fore hu'ne? Israeli vahe'mo'za fatgo vahe manisune hute'za ana'ana hu'za vu'nazanagi, fatgo vahera osenazanagi, huhamprima zmante'nea vahe'mo'za fatgo vahera sazageno, ruga'amokizmia zmarimpamo'a hanavetige'za, Anumzamofa kea ontahi'naze. <sup>8</sup>Avontafepi krenteneana, **Anumzamo'a zamazeri zmavutoko hu avamu nezmino, zmavua onke'sazegu reso nehuno, ke ontahisazegu zimagesa renknirege'za, ontahiza manime e'za ama knare ehanati'naze.** (Diu-Kas 29:4, Ais 29:10) <sup>9</sup>Hagi Devitia amanage huno hu'ne, **Zmatrenkeno rama'a ne'zama ne tratema eri atru huno nezamo'a, kukomo zmazeria kna nehuno, zmagigo zmi havere tanafa hazankna nehina mizazmia eriho.** <sup>10</sup>**Zmatregeno zmurgamo'a hanintiri nehinke'za nonkeza, zmagenamo fagagina pri hute'zage maka kna mniho.** (Sam-Zga 69:22-23)

#### Anumzamo megi'a vahe zmavresnia naneke

<sup>11</sup>Mago'ane zmantahinegoe, Israeli vahe'mo'zama tanafa hu'za traka hu'nazana ete oraotinaku traka hu'nazafi? I'o trakama hu'nazana

otigahaze. Hu'neanagi Anumzamofu zmeffi humiza nona'a, Anumzamofu megia vahe'mokizmia havi avu'ava'zampintira zmaresige'za, Israeli vahe'mo'za megia'a vahera knive rezmantegahaze. <sup>12</sup>Hagi Israeli vahe'mo'za kumi'ma hu'nazazamo, kokankoka vahetega marerisa asomura vu'ne. Trakama hu'naza zamo'a marerisa asomura megia'a vahe'mokizmia huzmantene. Hu'neanagi Israeli vahe'mo'za Anumzamofoma zmeffima huomizasina, inanknahu asomu kokankoka vahe'mo'za erizasine.

<sup>13</sup>Ana maka kema nehuana, megia'a vahe'mota tamagriku nehue. Anumzamofu megia'a vahe'mokizmi aposol manio huno huhampri'nantenegu ama ana eri'zamo'a nagripina kota eri'zani'a me'ne. <sup>14</sup>Mago'a kankamumpinti megia'a vahe'mota tamagripi eri'zani'a enerisugeno, Jiu vahe'nimo'za kniveneresageno, zmahoke ahesiegu nehue. <sup>15</sup>Na'ankure Israeli vahe'mo'za Anumzamofu zmeffi humiza zamo, kokankoka vahera Agrane zmazeri mago zmarimpa hu'ne. Hagi inankna hugahie Israeli vahe'ma Anumzamofu ma ete zmaresnia zamo'a, e'i fripinti oti'za zmasimu erizankna hugahaze! <sup>16</sup>Bretima krenaku heru'ma anteneza anampintima esera refko hu'za kre'za Anumzamofoma nemisageno'a, ana maka herunte'naza bretimo'a ruotage hugahie. Zafa'mofu rafunamo'ma ruotgema hu'nenkeno'a, ana maka azankunamo'enena ruotge hugahie.

<sup>17</sup>Hu'neanagi olivi zafa'mofu mago'a azankuna'aramina hantgi zmatreno, tmagrira afi olivi zafa'mofu azankuna'a mni'nazageno, tmavreno olivi zafare rukamrermantegeta amunozmifi mni'neta, zamagrane knare msavena agafafinti enerize. <sup>18</sup>Hu'negu tamagra azankuna'a mni'none hutma rantmagia e'oriho. Na'ankure tamagra rafunamofona aza nosazanki, arfunafinti tmaza hu'zana enerize. <sup>19</sup>Tamagra anage hugahaze, tagri rukamre'rantesnigu azankuna'aramina hantgi zmatrene. <sup>20</sup>E'i tamage, Jiu vahe'mo'za zmentinti osazagu hantgi nezmatreno, megia'a vahe'mota tamentinti hzagu tmazeri rukamre rmatene. Tamagra'agura antahisga osutma, Anumzamofonku koro huntaho. <sup>21</sup>Na'ankure Anumzamofu ma olivi zafamofu azankuna'a eri hantgima zmatrenesuno'a, tamagri enena tmatresigeta omnigosaze. <sup>22</sup>E'ina hu'negu Anumzamofu fru avu'ava ene hihamu avu'ava'anenku tamagesa antahiho. Trakama hzamokizmia Anumzamofu zmazeri haviza neheie. Hianagi tamagrira fru avu'ava hurmantegahie. Tamagrama Anumzamofu fru avu'avazma huta ovnageno'a, ru tamagri enena ana zanke huno hantgi tamatregahie. <sup>23</sup>Hagi Israeli vahe'mo'za zmentinti osu zmavuzmavapinti zmagu'a rukrehe hanageno'a, ete Anumzamofu ana azankunara erino zafarera rukamregahie. Na'ankure Anumzamofu amne anara huga hu'neankino, amne anara hugahie. <sup>24</sup>Na'ankure tamagra afi olivi zafamofu azankuna'a mni'nazageno, taga huno olivi zafa fatgore rukamreramanteneakino, Olivi zafa azankuna'a erino ete olivi zafa fatgorera rukamre zmantesigeno'a, knarezantfa hugahie.

### Anumzamo maka Israeli vahe zamaguvazisia naneke

<sup>25</sup>Nafuhetane nasaraheta, ama oku kea antahini hnazegu nagrira nave'nesie. Antahi'zantmifina antahizane vahe' mni'none huta rantmagia e'oriho. Mago'a Israeli vahe'mokizmi zmarimpamo'a erigineankino, mani'nenageno Anumzamo'a megia' vahera z mavregahie hu'neama'a efregahaze. <sup>26</sup>Anumzamo'a ana maka Israeli vahera eteno z mavregahie, Anumzamofu avontafepi krentenea kante, ***Vahe'ma knazampintima z mavre nera, Saioniti egahie. Agra Jekopu nagapintira Anumzane tragoteno omni avu'avazana emeri atregahie.*** <sup>27</sup>***Koma Nagrama huvempa huhagerafi kema huzmante'noa kemofu amage antena, kumi'zmia eritre z mantegahue*** hu'ne. (Ais 59:20-21)

<sup>28</sup>Israeli vahe'mo'za Anumzamofu ha' vahekna hu'nazageno, knare musenkemo'a megia' vahemotarega ne-e. Hianagi zamagrira huhampri z mante'neankino, zmesizmentene. Na'ankure z magehemofonku huno zmesizmantene. <sup>29</sup>Na'ankure Anumzamo'ma muse'zama zmi'nea vahepintira, ete ana zana e'origahaze. <sup>30</sup>Korapara tamagrama megia' vahe'mota Anumzamofu kea amagera ontenazanagi, Anumzamofu kema Israeli vahe'mo'za menina ontahizageno, Anumzamo'a tmagrira asuragi tmantene. <sup>31</sup>Ana hu'negu Jiu vahe'mo'za Anumzamofu kea amagera ontazageno, Anumzamofu rimpa fruzamo'a megia' vahe'mota tmagrite e'neankino, ana hukna huno tamagriterite ete vugahie. <sup>32</sup>Anumzamo'a maka vahe'mokizmi asuragizmantenaku ana maka'mokizmi zmatrege'za ke ontahi avu'avazamifi, kina hu'za mani'naze.

<sup>33</sup>Iza Anumzamofu marerisa fenozama'agi, antahizama'agi, knare antahintahizama'a refko huno kegahie? Anumzamofu knare antahintahizama'ane avu'avazama'a refako huta antahiamara huga osu'none.

<sup>34</sup>***Iza Ramofu antahi'zana antahino keno hu'ne? Hifi iza antahintahi'amo agaterenesigeno Ramofona antahintahia amigahie?***

<sup>35</sup>***Hagi iza Ramofona esera agatereno razana ami'nesigu, ete Ramo'a nona huno mizasentegahie?*** (Jop 35:7)

<sup>36</sup>Na'ankure Agripinti ana maka zamo'a fore nehuno, Agri hankavefi mikozamo'a me'ne. Miko zupa Ragi Agra erivava hanie, Tamage.

### Tavufga Anumzamofu amisuna zamofu nanenke

**12** <sup>1</sup>E'ina hu'negu, nafu'naganaheta tamantahinegoe, Anumzamo asuragirmante'nea zanku nentahitma, tamagra'a asimu erino manineno, Anumzamofonte kre sramna viankna hutma amivareta tamavufa nemita, mani ruotge nehutma, Anumzamofu rahi amiho. E'i avamupima mono huzamofu tamavutmavare. <sup>2</sup>Ama mopafi avu'avazanena tagrora oteho. Hianagi tamagra atrenkeno

antahintahitamia Anumzamo tmazeri kasefa nehanigeno, tamavutamava zamo'a ruzaha hino. Anama hanuta, tamage Anumzamofa avesizam'o'a, knare huno haviza osuno, fatgo hu'ne huta eriyama hugahaze.

<sup>3</sup>Na'ankure Anumzamo'ma asunkuzama'areti asumarginantenereti, maka motarega amanage nehue, tamagratmigura antahinkeno rana osenketa, vahe'mo'za nemaniza kante maniho. Tamagra'a tamavutamava refako hutma negeta, Anumzamo tamami'nea tamentintireti, tamagra ina avamente maninafi refko hutma keho. <sup>4</sup>Magoke tavufgafina tagiagi, tazanki tavurgagi tagonagi tagiki huno me'ne, hakare'aza me'neanagi e'i ana'maka zamo'za magoke eri'zana enorize. <sup>5</sup>Tagri tavufgamo hu'neankna huta tagra rama'a vahe mani'nonanagi, tagra Kraimpina magoke avufga mni'neta, ruzahu ruzahu avufga'a mani'none. <sup>6</sup>Anumzamo'a Agra'a asunkuzanteti, ruzahu ruzahu eri'zama eri'zamofa muse'zana magoke magoke'mota tamitere hu'ne. Hu'negu Anumzamo'ma kasnampa kema hu hankavema kaminesigenka, Anumzamo'ma kaminesia kamentinti avamente huama huo. <sup>7</sup>Ru vahe'mokizmi zamazahu musezama tagripima menesigeta, so'e zantfa huta zamaza hanune. Hagi rempi huzame musezama erinesuta, rempi huzami so'e hanune. <sup>8</sup>Iza'o ru vahe'mokizmi zamazeri hankaveti musezama agripima me'nesigeno'a, zamazeri hankavetigahie. Hagi vevahu musezama agripima me'nesigeno'a, mago'a zankuma atupama hanaza vahera zamisige'za rama'a erigahaze. Hagi Anumzamo'ma vahe kva huzamante hankavema aminesiana, agra'a ana eri'zana agu'areti huno eriso'e huno erino. Hagi vahema so'e hunte musezama erinesimo'a, musezampinti so'e zana huzmaverino.

#### Avesintezamofa nanenke

<sup>9</sup>Tamage hutma vahe'mofona zmavesizmanteho. Kefo avu'avazana tamagena hunenteta, knare avu'avazana azeri hankavetiho. <sup>10</sup>Tamagra tamage hutma ovesinte avesinte nehuta, tamagra tamavufga anteneramitama, arumokizmi husga huzamanteho. <sup>11</sup>Tamavesra osutma hanavetitma eri'zana erinkeno, Avamumo'a tamazeri otina Ramofa eri'zana eriho. <sup>12</sup>Fore hanigu hankave antahintahima hunemiza zankura musena nehuta, tusi'a knazama fore'ma hanigetma kazikazi huta nevutma nunamu huvava hiho. <sup>13</sup>Anumzamofa vahe'mo'zama mago'a zankuma atupa hanagetama, zmazama hanagura tro huta maniho. Onkenesnaza vahema esnageta nontamifi kehuta zamavrenteho.

<sup>14</sup>Knama tamisamokizmia asomu ke huzmanteho. Anumzamo'a asomu huramantesie nehutma, zmazeri haviza hanie hutma osiho. <sup>15</sup>Musema hanaza vahe'enena muse nehuta, zavi'ma atesnaza vahe'enena zavira ateho. <sup>16</sup>Ovesinte avesinte huta magoke avamente maniho. Tamagra tamavufga erisaga osiho, hianagi agi omane vahe'ene manizanku tamavesino. Tamagra ana miko'zana antahi'none huta osiho. <sup>17</sup>Mago

vahe'mo'ma havizama huramantena, ana nona'a haviza huonteho. Ana mikozama hanafina fatgo tamavutmava nehinke'za, miko vahe'mo'za tamageho. <sup>18</sup>Tamagrama ana hugahanutma, miko vahe'enena tmarimpa fru huta manigahaze. <sup>19</sup>Rone'nimota mago'mo haviza hurmantena nona'a huonteho, hagi Anumzamofa fatgo rimpa hezampi atrenkeno vino. Na'ankure avontafepina anage huno krentene, ***Nagra'a nona'a huzamantena mizana zamigahue huno, Ramo hu'ne.*** (Diu-Kas 32:35) <sup>20</sup>***Hianagi ha'ma rermantesaza vahe'moza zmagakuma hanageta, nezana zamiho. Tinku'ma zamavesina, tina zaminke'za neho. E'i ana huknazama hanazana, zamagrama nehaza zmavuzmava zankura zmagaze hugahaze.*** (Prov-Knr 25:21-22) <sup>21</sup>Tamagra atrenkeno havi avu'avazamo'a tamazeri agate'oreno, hianagi knare tamavutamava hutma havi avu'avara agatereho.

### Kamani vahe'mokizmi agorga'a manizamofa naneke

**13** <sup>1</sup>Kamani vahe'mokizmi agorga ana mikomota anteramita manigahune. Na'ankure miko hanavea Anumzamofontegati e'neankino, Anumzamo hankavea kamani vahe'mokizmia zamige'za fore hu'za mani'naze. <sup>2</sup>Hu'negu iza'o kamani vahe'ma ha'rentesimo'a, Anumzamofa trake ha'rentean kino, ana knazana agra'a erigahie. <sup>3</sup>Na'ankure kamani vahe'ma mani'nazana, fatgo zama haza vahe zamazeri korera nosaze. Hianagi kefozama haza vahe zamazeri korera nehaze. Kamani vahe'ma kore huozmantesue hanunka, fatgo kavukva nehuge'za, kazeri antesga hiho. <sup>4</sup>Kamani vahe'ma mani'nazana tamagri knare zanku huzmantege'za mani'nazanki'za, Anumzamofa eri'za vahere. Hianagi kagrama hazenkema nehanunka, korera hugahane. Na'ankure zamagra hazenkema hanaza vahe'mokizmi, knomazamino zmazeri fatgohu hakavea eri'naze, kano zamiza zamazeri fatgo hanaza agafare, Anumzamo'a zmantege'za mani'naze. <sup>5</sup>E'ina hu'negu Kamani vahe'mokizmi zmagorgama mani'zamo'a knare hu'ne. Hianagi zmaheno zmazeri ante fatgo huzankukerompage, tagra'a tagu'tagesafina fatgo'za nehune huta antahigahune. <sup>6</sup>Ama ana agafare takisi zagoa miza nehune. Na'ankure kamani vahera Anumzamofa eri'za vahe mani'naze, hakare'a knazupa zmagra vahe'ma kvagrizmante eri'za enerize <sup>7</sup>Ana miko vahe'mokizmi zama eri'nesanazana etenka zamio, takisi zagoma amio hunesizana neminka, fenoma mizasenanten takesi miza huo hanigenka miza nehunka, kore huzmanteho hu'nesaza vahera, kore hunezmanteta, rahi zmagi zmiho hunesia vahera, ra agi zamiho.

### Avesintezamofa naneke

<sup>8</sup>Atrenkeno nofima hu'zamo'a tamagripina omaneno, hagi rumokizmi zamavesinte nofimoke tamagripine meno. Na'ankure tva'ontamirema



nemanizamokizmigu avesintezamo'a, kasegemoma hu'nea kea eama nehie. <sup>9</sup>Na'ankure kasegefina amanage hu'ne, ***Ru vene a'enena monko'zana osuo, Vahera zmahe'ofrio, kumzafa oso, vahe zantera kegnunu osuo*** hu'ne. (Eks-Uti 20:13-17) Ruga'a kasegemo'za ama magoke kasegefi me'naze. E'i ana kasegemo huno, ***kagraguma kavesi nentanankna hunka, tva'onkare maninesimofona avesinto*** hu'ne. (Lev-Pri 13:9) <sup>10</sup>Tva'ontema mni'namokizmi avesintezamo'a havizana omnene. E'i ana hu'negu vahe'ma zmesintezamo'a kasege eriknare nehaze.

<sup>11</sup>Tamagra ama anahu tamavutamava hiho, na'ankure tamagra antahinaze, menina knamo'a kofa hu'nefi mni'nonanki, masenazafintira otiho. Na'ankure tahokeno tavrezamo'a, tagu'ama rukrehema hunontetima amare'ma ehnatiana, hago menina erava'o nehie.

<sup>12</sup>Hanizamo'a kofta huno vagaresigeno, masama fore'ma hania zamo'a kofta hu'ne. Ana hu'negu hanizamofu avu'ava zama nehuna zana netreta, msamofu ha' kukena hanune. <sup>13</sup>Ana hu'negu msarema nehazankna huta knare tavutava nehuta, hanizamofu muse zampina omanita, aka tina oneta neginagi osuta, monkozana nosuta, monko avu'ava huzampina omanita, mago rimpa osu avu'avazampine omnita kanive oreho.

<sup>14</sup>Hu'neanagi atrenkeno, Ramo, Jisas Kraisi tamagripina mani'nenno, kefozama hu tavesizana eri atreno.

#### Hanave amentintine hanave'a omne amentintimofu naneke

**14** <sup>1</sup>Zamentintifima hanavema otinesamokizmia tamagraraga zmvarenentetma, antahintahifina knare hu'ne haviza hu'ne hutma zmentinti zmimofona refko huozmanteho. <sup>2</sup>Na'ankure mago'amokizmi zamentintimo'a knare hu'neankita makazana amane negahune nehaze. Hianagi mago'amokizmi zamentintimo'a hanave'otineankiza, hozafi nezanke nenaze. <sup>3</sup>Hagi fatgo hune huno nehuno maka'zama ne'nesnimo'a, anama nosanimofoma kefenkami ote'no. Hagi mago'a nezama nonesnamo'za, maka'zama nenesnamokizmia refko huozamanteho. Na'ankure Anumzamofu zmvarene. <sup>4</sup>Kagra izaga rumofu eri'za vahera refko hunezmantane? Agri'a kva'amo refko huntenu, kagra eriza ka'are otigahananki, kagra evuramigahananki huno huntegahie. Hu'negu Ramoke azeri otisigeno, otino manigahie.

<sup>5</sup>Anahukna kante mago'mo mago zgegnamo ruotage huno ruga'a zgegna zmagaterene huno agesa nentahisigeno, ete rumo'a ana'maka zgegnamo'za mago'zanke hune huno agesa nentahie. Mago mago'mo'ma, mago knaguma knare hu'ne hunoma antahinemia knagura, atrenkeno tamarimpamo'a fruhino. <sup>6</sup>Iza'o mago zge'gnamo ruotge hune nehuno, Anumzamofu mono huntesia, agra e'i Anumzamofu mono hunente. Iza'o ruzahu ruzahu neza nenesimo'a, Anumzamofonku nentahiza negahaze. Na'ankure zamagra Anumzamofu susu huntete'za nenaze.

7Na'ankure tagra tasimu erita mani'nonana tagra'a suzana omanene, nefruna zana tagri'a zana omanene. 8Na'ankure tasimuma eritama mani'nonana, Ramofonte nemanune. Hagi frunana Ramofonte nefrune. E'ina hu'negu frisuno, tasimu erita manisunana Rantimof'o'za me'ne. 9E'i ama ana agafare, Kraisi'a friteno ete otino asimu erino manine. Hu'negu asimu erino mani'nea vahe'ene, fri'naza vahe'mokizmi Ra mani'ne.

10Hu'negu, nahigenka mono negafu amentintigura knare osu'ne hunka refako hunantane? Hifi nahigenka mono negafuna hufenkami netrane? Na'ankure ana maka'mota Anumzamo refako hurantesia tratera otigahune. 11Na'ankure Mono Avontafepe amanage huno krentene, **Ramo'a amanage nehie, tamage nasimu erina maninesnuge'za maka vahe'mo'za Nagrite zmarena neresageno, anamiko vahe'mo'za, huama hu'za Anumzamofona rahi amigahaze** hu'ne. (Ais 45:23)

12Ana hu'neankita magoke magokemota Anumzamofona maka'zama nehuna zamofa kea asamigahune.

13E'ina hu'negu rumokizmima refko hunezmantona zana atreho. Tamagra'ma antahintahitamima retroma hanazana, mono neramafu zamentintifi zmagigo zamino, zamazeri tanafahu havegna huta omanisune hiho. 14Ranimo Jisasi'a eriana higena kena atahinama huana, mago'zamo'e huno agru osu'ne huta osugahune, magozamo agru osune hunkama antahisanana, e'i ana zamo'a kagriteri agru osugahie. 15Hagi mago'a zama nenesana zankuma mono negafuma antahi havizama nehanigenka, kagra mago'ane avesi zampina nomanine. Atrenkeno nezama nesasazamo'a Kraisi'ma zamagrikuma huno fri'neamokizmia zmarimpa zamazeri haviza osino. 16Ana nehuta atrenke'za knare hune huta tamentinti nehanaza zankura, havizane hu'za osiho. 17Na'ankure Anumzamofa Kumara, neza ne'zane, ti nezana omanene. Hianagi Ruotge Avamupi fatgo avu'avazane, arimpa fru'zane, musenkase hu'za me'ne. 18Na'ankure iza'o Kraesima ama ana avu'avatetima avaririsimofona, Anumzamo'a muse hunetesigeno, vahe'mo'za nege'za hugnare huntegahaze. 19E'ina hu'negu atrenketa musezama mono kevufima fore'ma hanea zanku nehuta, tagra'ragara ozeri hankaveti, azeri hanaveti huta tamentintifina hageta ra hanune. 20Nezantekure huta Anumzamofa eri'zana eri haviza osiho, ana miko'zamo'a avusese hu'ne. Hianagi knarema osu'niana, mago'mo'ma nefu azeri tanafa hunaku'ma nesia zamo'e. 21Ame'a onesuno, negi ti onesuno, mago'azama hanunazamo mono nerafu amentintia azeri tanafa osanunana knare hugahie. 22Kamentintima hanana, kagra Anumzamofa hanave kamentinti hunemine. Iza'o amentintima nehania zanku'ma antahintahafima haviza nosue huno osnimo'a muse hino. 23Hu'neanagi tare antahintahi nehuno, nesimo'a haviza hane huno agu'amo'a nesamie. Na'ankure amentinti huteno none, haginano ana miko'zama amentintima osu'nenano hania zamo'a kumire.

## Ru vaheku antahizmisuna naneke

**15** <sup>1</sup>Tamentinti zampima hanavema tinomota, hanavema otinesamokizmia zamaza hanune. Hagi tagra'ama taza huzankukera ontahisune. <sup>2</sup>Mago'magomota tava'ontirema nemanisamokizmi knare'zanku huta zmaza nehanunke'za, zmentintifina hanaveti'za hage'za marerisaze. <sup>3</sup>Na'ankure Kraisi'enena agra'a avufga aza haniazankura ontahineanki, avontafepina amanage huno krentene, **Vahe'mo'za huhavizama hugantazana, nagri nagofetu hunteghaze** hu'ne. (Sam-Zga 69:9) <sup>4</sup>Na'ankure ko Anumzamofa avontafepima miko kema krente'naza kemo'a, tazeri antefatgo nehuno, tazeri hankavetisigeta knazantifina kazigzi huta nevuta, fore'ma hugahie huno avontafepi krente'nea zankura avega antegahune. <sup>5</sup>Anumzamo knazantifima tazeri hankavetigeta kazigazi huta nevumo, Kraisimpina mago tamarimpama huzana tamisigeta, magoke huta manigahune. <sup>6</sup>E'ina hu'negu ana mikomota mago tamarimpa nehuta, tagrira erinte mago huta, tagu'areti Rantimofa Jisas Kraisi Nefa, Anumzamofona rahi amisune.

<sup>7</sup>E'ina hu'negu, Kraisima tamagrima tamavre'neaza huta, tamafuheina zamavareho, ana hanageno Anumzamo'a rahi erigahie. <sup>8</sup>Antahiho, Anumzamo'ma Israeli vahe'mokizmi nezmageho huvempa huzmante'nea kea eriana hanige'za kesazegu, Kraisia eri'za vahekna huno zamagritera e'ne. <sup>9</sup>Ana hu'negu megi'a vahe'mo'za Anumzamo'ma asunkuma huzmante'nea zankura, rahi amigahaze huno avontafepi krentene, **E'ina hu'negu nagra megi'a vahepina rankagi negamina, nagra zgamera hu'na kagi'a erisaga hugahue** hu'ne. (Sam-Zga 18:49) <sup>10</sup>Mago'ane amanage hu'ne, **Megi'a vahe'mota, Agri vahe ene musenkase hiho** hu'ne. (Diu-Kas 32:43) <sup>11</sup>Ete mago'ane amanage hune, **Ramofona rahi amiho, maka megi'a vahe'mota, ana miko mopafi vahe'mota ahi erisaga hiho** hu'ne. (Sam-Zga 117:1) <sup>12</sup>Ete mago'ane kasnampa ne'mo Aisaia anage hu'ne, **Jesimpinti efore hanimo'a, Agra megi'a vahe'mokizmi kva mani'nenke'za, Agrite zmazama huzankura amuhara hugahaze hu'ne.** (Ais 11:10)

<sup>13</sup>Fore'ma haniguma amuhama nehunazamofa Anumzamo, miko musezane rimpa fruzana tamentintifina antevinetena, Ruotge Avamumofa hankavefi fore'ma hanigura amuhara hugahaze.

<sup>14</sup>Nafu nagnahete nagrani'a antahuana, tamagripina knare tamavut mavamo'ene mika'a antahizamo avite'nena, ozeri fatgo azeri fatgo hugahaze. <sup>15</sup>Hianagi mago'a nanekegu avompima hankavetina kreraminoana, Anumzamo'ma asunku'ma hunante'neazanteti ete mago'ane huramagesama hanigu krerami'noe. <sup>16</sup>Kraisi Jisasi eri'za erina megi'a vahetega prisi vahe' kna hu'na, Anumzamofa knare musenke huama nehue. Ana hanige'za megi'a vahe'mokizmia Ruotge Avamumo

zmazeri ruotage hu'nige'za, Anumzamo muse huno eneria kre sramnagna hugahaze. <sup>17</sup>E'ina hu'negu Anumzamofu eri'zama enerua zankura, Kraisi Jisasimpi knare hu'noe hu'na navufa rana hugahue. <sup>18</sup>Mago'a zankura nagra navufga erisaga osugahuanki, Kraisi'ma nagripima erivgarenea eri'zamo higeno, megia' vahe'mo'za amagera nentaze. <sup>19</sup>Ruotge Avamumofu hankavefine, avame'zane, ruzahu ruzahu'za kaguvaza erifore hu'zamofu hanavere, Kraisi musenkea Jerusaleti huama hu'na Ilirikium kaziga (Masedonia-Italy) ome huvgare'noe. <sup>20</sup>Hianagi nagra, Kraisi agima nohaza vahepi knare musenke huama hu'na zmasamisuegu, tusi'za huno navesiankina nagra rumo'za kinaza tratera nona nonkue. <sup>21</sup>Hu'neanagi mono avontafepina amanage huno krentene: ***Agri agi agenkema ozmasminesaza vahe'mo'za negesnage'za, Agri agi agenkema ontahinamo'za antahi ama hugahaze hu'ne.*** (Ais 52:15)

**Polia Romu vahe ome zmagenaku antahintahi retro hu'nea naneke**

<sup>22</sup>Nagra nantuma antena eme tamagenaku'ma huana ama agafare ome'noe, na'ankure ama kumapina mono naneke huama nehune. <sup>23</sup>Hianagi nagra ama kaziga menina hago eri'zana eri v'gare'noe, haginno rama'a kafufima emema tamagesue hu'na avegama ante'noa zamo'a tusi'za huno navesie. <sup>24</sup>Nagra Speini kumate vunaku antahintahia retro nehuankino, vanuna onsi'a kna tamagrane umaninena mono kea nehu'na, vunaku'ma hanugetma naza hanagena vugahue. <sup>25</sup>Hianagi Nagra menina mono kevu naga museza antezmantazaza zaminaku, Jerusale kumatega nevue. <sup>26</sup>Na'ankure Masedonia kumateti ene Akaia kumateti mono kevu'mo'za muse hu'za Jerusale kumate mono kevu'mokizmi amu'nozmfifi, zamunte omne nagamokizmi zgo eritru hazagena erina nevue. <sup>27</sup>Zamagra zagoma eri atruma hazazankura tusi'a muse hu'naze. Zamagrama antahizana nofi hu'nazaza katufeankna hu'naze. Na'ankure megia' vahe'mo'za Avamumofu asomuma eri'naza zanku, Jiu vahera amega zamufamofu zmaza hu'za zami'naze. <sup>28</sup>Hagi ama ana erizama erivanerena, ana zama zamivaretasuna, nagra Speini kumate enevanuna, eme tamageme vugahue. <sup>29</sup>Nagra antahinoe tmagritegama esu'na, Kraisi asomumo avitenenkena egahue.

<sup>30</sup>Nafu'nganahete, nagra tamantahigoe, Rantimofu Jisas Kraisine Ruotage Avamumofu avesizante, amama amuhoma e'nerua zantera nagri'ene eme hagerefitu, Anumzamofontega nunamu hunantesazegu nehue. <sup>31</sup>Nunamu nehinkeno zmentinti osu Judia vahepintira Anumzamo nagu'nevazina, Jerusale mani'naza vahe'mo'za kema hanuana antahinamiho. <sup>32</sup>Hanigena Anumzamofu avesizama me'nena, nagra tamagritega muse hu'na egahue. Hanigeta tagra ozeri hankaveti azeri hankaveti hugahune <sup>33</sup>Hagi menina rimpa fru Anumzamo tamagrane manisie. Tamage.

**Polia musenke afuhe'i huzmante'nea naneke**

**16** <sup>1</sup>Senkeria kumateti diken i mono eriza e'neria nersaro Fibina knare'za huntasazegu nehue. <sup>2</sup>Muse hutma Anumzamofu nagapina rahi me'nea vahekna huta Ramofompina nevareta, nazankuro atupama haniazana aza hihogu nehue. Hagi ana a'mo knare huno nagri'ene rama'a vahe'mokizmi tza nehia aki, knare huta aza hiho. <sup>3</sup>Krais Jisasimpima magokama eri'zama e'nerunamokiznia Prisirane Akuilakizania muse keni'a znasamiho. <sup>4</sup>Tamage nagrikura znasimu atresna'aza neha'e, nagrakera keke hunoznantoanki, ana miko megia' mono naga'mo'za musenke hurantaze. <sup>5</sup>Anahukna huta nozni'afima atru nehaza mono nagara musenke huzamantoe. Esia kazigati, kotama Kraisinte agu'a rukrahe hu'nea roneniamotofo, Epenetusi musenke huntoe. <sup>6</sup>Maria tamagriku huno hanavetino eri'zama eneria a'mofona musenke hugantene hutma asamiho. <sup>7</sup>Nagri'a nagapinti Antronikasi ene Juniake, nagrane magoka kina hu'namokizni musenke huznantene hiho. Aposol nagamo'za ke'za antahiza hu'naza netrene. Znagra kota Kraisintera znagu'a rukrehe hutakena, nagra henka nugu'a rukrehe hu'noe. <sup>8</sup>Ampliatulina, Ramofompi navesinentua roneniamotofo musenke hunteto. <sup>9</sup>Magoka Kraisi eri'za e'neruna ne' Ubanulina musenke hunentena, knare roneni'a Stekisini musenke hunteto. <sup>10</sup>Kraisi eri'za tamage huno eneria ne' Apelesi musenke hunentena, Aristobulusi nompini nemniza nagara, musenke huzmantoe. <sup>11</sup>Nagri nagapinti ne' Herotionina musenke hugantene hutma asamiho. Nasisusi nompini, Ramofonte mni'nazana nagakura musenke huramante huta znasamiho. <sup>12</sup>Ramofonte eri'za hanavetike eneri'a atre Traifena ene Traifosakigiznia musenke huranantene huta znasamiho. Ramofonte tusi'za huno hanavetino eri'zama enerige'na navesinento'a a'mofo Pesisinena musenke hugante'ne huta znasamiho. <sup>13</sup>Rufusina Ramo, Agri'a suzane huno huhamprinteno avrenemofone, agri nerera'a nagri'enena nenareraza hu'nea ara musenke hugantene huta asamiho. <sup>14</sup>Asinkritusima, Flegonima, Hemesima, Patrovasima, Hemasiz'anema nemaniza tafuhe'ine, tasarahehe'ina musenke huramantene huta znasamiho. <sup>15</sup>Filogusima, Juriamina, Nereusi ene nesaro a' ene, Olimpasi ene, ana miko Anumzamofonte mani'naza nagatega musenke huramantene hutma znasamiho. <sup>16</sup>Maka Kraisi mono nagamo'za tmagri'tega musenke atrazageno vie. Fatgo huno ruotge hu'nea avu'ava hutma agi hene, agona ahene hutma maniho.

**Poli'a vgare zmvumro zmante'nea naneke**

<sup>17</sup>Nafu nagnahete, hankavetina ama kea neramasamue, Amu'notamifima atane'zama avrenente'za, koma rempi huramigeta antahi'naza ke'ma, havigeretima eme rempi huramiza tamentintima

eri kragogo negiza vahekura, kva hunetma mani kore hutma ogantu'a maniho. <sup>18</sup>Na'ankure e'i ana vahe'mo'za Rantimofu Kraisi eri'zana e'norizanki, zamagra'a knare zankuke nentahize. Haga huno masave ke zmireti, fatgo zmavu'zmavama nehza nagara zamarevatga nehaze. <sup>19</sup>Kema amage nentaza tamavutmavamofu naneke maka vahe'mo'za antahivgare'naze. Hianagi tmagrikura musezanimofu avite'ne. Hianagi nagri'ma navenesiana, knare antahintahizanteti tamagra knare'ma hu'nesia avu'ava nehutma kefozana osiho. <sup>20</sup>Arimpa fru Anumzamo'a kofa huno Satana, kagafi azeri antefenka anteno rehapatigahie. Rantimofu Jisasi Kraisi asuntgizamo'a tamagra ne mesie.

<sup>21</sup>Magoka eri'za eneru'a ne'mo Timoti musenke atreramante. Anahukna hu'za nagri nagamo'za, Lusiusima, Jesonima Sosipeta'zanena musenke hurmantaze.

<sup>22</sup>Nagra Tertiusina, Poli ke nehigena ama avoma kre'noa ne'mo'na musenke Ra'mofompi hurmantoe.

<sup>23-24</sup>Kaiusia noma'afi nagri ene mono kevu nagamota tavrentegeta muse huta amafi nemnuna ne'mo, tamagritega musenke atreramante. Erastusi'a rankumamofu zgore kegva hu'nea rankva ne'mo ene Kuatusi'a, mono nerafu, tmagritega musenke atrermantaze. [Rantimofu Jisas Kraisi asomumo maka tamagrane mesnie.]

<sup>25</sup>Anumzamo'a tmagrira knare musenkema neramasamua kante tmazeri hankavetise. E'i Jisasi Kraisi knare musenkene, vahe'mota tmavresigu korapa oku'a retro hunte'nea naneke neramasamue.

<sup>26</sup>Hianagi manivava Anumzamo huzamantege'za, kasnampa vahe'mo'za avontafepina krente'naze. Ama ana kemo'a megia vahete eama hige'za, maka kaziga vahe'mo'za negaze. Hu'negu zamaganena nege'za zamentinti nehu'za amage antesazegure. <sup>27</sup>Agrake, knare antahizane Anumzamo, Jisas Kraisimpi, ra agi'a erivava hugahie. Tamage.